

# Palajatkat Karaloukta nütüma Pablo namüin na Chajanakana

## CORINTO

**1** <sup>1-2</sup>Taya, wane chi Aluwataaushikai nütüma Cristo Jesús, Pablokai anülia, aneekuushi taya nütüma chi Maleiwakai süka nücheküin taya süpüleerua nuluwatawaa. Otta tayakai nümaa chi wawalakai Sóstenes, wasaküin jia anoujashiikana nünain chi Maleiwakai chakana sulu'u tü outkajaaleekat cha'aya Corinto, jia akataluushikana suulia jaainjala nünainmüin chi Maleiwakai sünainjee tü naa'inrakat Cristo Jesús. Anii joo taya ashajün jümüin jiakana je sümüin tü anoujasükaliürua sainküin mmakat süpüshua eekai süchuntüin nümüin chi Wasenyotsekai Jesucristo, sümaa niain Nasenyotsein wanaa wamaa saa'u aneekuushin waya wapüshua nütüma chi Maleiwakai süpüla wayainjanain nüpüshin.

<sup>3</sup>Achuntüshii waya nümüin chi Washikai Maleiwa je nümüin chi Senyotkai Jesucristo süpüla nee'iyatüin na'anasia waneepia jümüin je süpüla naapünjanain anaa jümüin.

### Aapaa analu'ut

<sup>4</sup>Taapüin waneepia analu'ut nümüin chi Maleiwakai jaa'u, süka

anamiashaatain ma'i nia jümüin sünainjee süpüshua tü naa'inrakat Cristo Jesús. <sup>5-6</sup>Yalayatshii jia nütüma chi Maleiwakai süpüla a'yatawaa nümüin sünain aküjaa nüchiki Cristo, chi O'tte'eriükai, sümüin wayuu saa'u jaapaain tü nüchikikat waküjakat paala jümüin. Je akaaliijünüshii jia nütüma Cristo süpüla ji'raajüinjachin chi Maleiwakai. <sup>7</sup>Je naapüin chi Naa'inkai Maleiwa jümüin wane'ewaare jukua tü atüjaakat süpüleerua a'yatawaa nümüin chi Maleiwakai süka süpüshua jaa'in süma'inru'u ja'atapüin nii'iyataainjachin wamüin wapüshua chi Wasenyotsekai Jesucristo. <sup>8</sup>Akaaliijüneena jia nütüma Maleiwa süpüla katsünjatüin jaa'in waneepia sünain tü jünoulakat süpüla lotünjatüin jukuaippa nu'upala so'uweena tü ka'i nii'iyataainjachikat o'u chi Wasenyotsekai Jesucristo. <sup>9</sup>Shiimüin sünain jükaaliijüneenain süpüla katsünjatüin jaa'in, süka pansaain nünüiki chi Maleiwakai sünain naa'inrüin waneepia süpüshua tü nüküjakat achiki wamüin. Nia aneekaka jia süpüla wanaawajiraainjatüin jaa'in nümaa

chi Nüchonkai, chi Wasenyotsekai Jesucristo.

**Akatajirawaa sulu'u tü outkajaaleekat**

<sup>10</sup>Saa'u jünoujain jüpüshua nünain chi Senyotkai Jesucristo, jalia jia suulia a'ülüjaajirawaa. Anakaja müleka ayatüle jia sünnain paa'inwaa sünnain anoujaa süpüla wanaawajiraainjatüin jaa'in.

<sup>11</sup>Tawalayuwaa, taapa achikichii jia sütüma süpüshi tü wawalakat Cloé sünnain jü'ülüjaajiraain.

<sup>12</sup>“Nikirajala taya Pablo”, müsü waneerua ja'aka.

“Nikirajala taya Apolos”, müsü nünüiki wane'e.

“Nikirajala taya Pedro”, eeshi makai.

“Nia Cristo kekirajalaka taya”, eeshi makai ne'e.

Shiimüin eera sünnain jü'ülüjaajiraain je sünnain ju'waataain sulu'u nukuaippa chi ekirajakai jia.

<sup>13</sup>Jiakana anoujashiikana nünain Cristo, nnojotsü anain müleka jükatajiraale tü jünoulakat sünnain “Chi ekirajakai taya, nia Pablo” sünnain namüin waneerua ja'aka. Chi akachennakai sünnain tü kuruusakat süpüla o'utinnaa aa'in, nnojoishi tayain. Nia Cristo. Je tü woutisakat anainjee jia, nnojotsü shiain tü taa'inrakat. Shia tü naa'inrakat Cristo. <sup>14-16</sup>Naya tawoutisaajaka ne'e ja'akajee Crispo oo'ulaka Gayo je Estéfanos namaa na nüpüshikana. Nnojotsü sotüin taa'in müleka tawoutisaajüle noo'omüin. Taapüin analu'ut nümüin chi Maleiwakai saa'u nnojoliin wainmain na tawoutisaajakana ja'aka, suulia “awoutisaajünüshii na wayuukana nütüma Pablo süpüla suushikajaain ne'e nüchiirua”, suulia

sümajüin wayuu jümüin. <sup>17</sup>Nnojoishi ajütüin taya nütüma Cristo süpüla awoutisaajaa wayuu, nuluwataain taya süpüla taküjainjachin nüchiki niakai, chi O'tte'eriikai, sümüin. Shiimüin sünnain pülashin chi Maleiwakai süpüla nu'tte'eriin wayuu sünnainjee ouktüin Cristo saa'u tü kuruusakat. Otta tayakai, müleka taküjüle nüchiki chi O'tte'eriikai süka pütchi tekiirujut ne'e, nnojoleena anoujain na wayuukana nünain Cristo süpüla o'tte'enna.

**Atüjaa otta nüpülain chi Maleiwakai**

<sup>18</sup>Tü nüchikikat Cristo sünnain ouktüin saa'u tü kuruusakat, malaa saa'in namüin na wayuu amüloulinjanakana sünnainjee manoujain. Otta wayakana anoujashiikana, watüjaa aa'ulu tü pütchikat sünnain shiain tü o'tte'ennakat anainjee waya nütüma chi Maleiwakai, süka pülashin nia süpüla nu'tte'eriin waya sünnainjee ouktüin Cristo saa'u waainjala. <sup>19</sup>Shia tü nüküjakat achiki chi Maleiwakai sünnain süshajünüin paala:

“Tü jülüjakat naa'in chi wayuu eekai kekiin naashin sünnain nnojolin nünoujain tanain, nnojotsü kasajatüin tamüin. Amalajaweerü tatüma tü naashajaakat achiki, süka pütchin nikiirujut ne'e”.

<sup>20</sup>Soto jaa'in nakuaippa na wayuu kekiishiikana naashin sünnain nayouktüin chi Maleiwakai, oo'ulaka nakuaippa na karalouktamaajanakana eekana manoujain, oo'ulaka na pütchipü'ükana eekana naashajaain pütchi nikiirujut

müle'e. Müshi chi Maleiwakai nachiki: "Mayaashije kekiin naya naashin, maa'insalii naya, süka nekirajüin süinain tü shikirajakat anain tü manoujainsatkalüürua sainküin mma". <sup>21</sup>Nia Maleiwa kekiika, atüjaka nümüüwa. Otta chi wayuu eekai manoujain, nnojotsü nuuntuin ni'raajüin chi Maleiwakai sükajee nikii ne'e nümüüwa, süka nnojolüin shiain sukuaippain tia nütüma chi Maleiwakai süpüla ni'nnaajününjachin sütüma wayuu. Alu'ujasa müleka nünoujale nüchiki chi O'tte'eriikai, mayaasüje malaain saashin wayuu, o'tte'enneechi. <sup>22</sup>Na wayuu judíokana, wanaa sümaa naapüin tatüma tü nüchikikat Cristo, nachuntuin tamüin taa'inrüin no'upala wane kasa pülasü nütüjakat apüleerua Maleiwa nümüüwa, süpüla naapaainjatüin tü tamakat namüin. Je na "gentilekana", na nnojoliikana judíoin, shia nachekaka naapajeein sünüiki wayuu eekai kekiin naashin. <sup>23</sup>Otta waya ekirajülikana süinain tü shiimüinkat, tü waküjakat achiki, shia nüchiki Cristo süinain nükachennüin sütüma wayuu süinain tü kuruusakat süpüla ouktaa. Mayaasüje keke'erain süchiki tü kuruusakat namüin na judíokana, je mayaasüje malaain tü pütchikat namüin na gentilekana, ayatshi'iya waya aküjüin süchiki. <sup>24</sup>Akaajasa'a waya eenakuushikana nütüma chi Maleiwakai süpüla anoujaa, ja'itaina judíoin maa'aya aka eekai gentilein, kamalainsü wamüin tü pütchi nüchikikat Cristo chi O'tte'eriikai. Watüjaa aa'ulu sütüma süinain shiimüin süinain atüjain ma'i chi Maleiwakai, je süinain pülashin ma'i nia süpüla nu'tte'erüinjanain waya. <sup>25</sup>Mayaasüje malaain nüchiki

Cristo saashin wayuu, alana'aleeshia ma'i chi Maleiwakai süinain atüjain suulia ekirajaakat pütchi shikiirujut ne'e. Je mayaashije nnojolin pülain chi Maleiwakai saashin wayuu, alana'aleeshia ma'i nia süinain pülain suulia wayuu eekai su'waataain sulu'u sukuaippa ne'e sümüüwa.

<sup>26</sup>Tawalayuwa, soto jaa'in jamakuaippaliin paala jeenakünaiwa'aya nütüma chi Maleiwakai süpüla anoujaa. Nnojoliishii wainmain ja'aka eekai atüjain saashin wayuu, eekai kojutuüin sütüma wayuu, otta eekai nachooiin washinnuu. <sup>27</sup>Na wayuu "¿Kasakai ne'raajaka aa'u?" münakana amüin, naya aneekünaka nütüma chi Maleiwakai süpüla aapülüjaa na ayoutakana nia saa'u kekiin naya naashin. Je na wayuu malayaakana aa'in, naya aneekünaka nütüma süpüla aapülüjaa na yalayatshiikana naashin. <sup>28-29</sup>Je na wayuu nnojoliikana jamajanain amüinyüü natüma na manoujainsaliikana, na pülakana oulia naa'in süka nnojoliin washinnuüin, je na mojutkana sütüma wayuu, naya aneekünaka nütüma chi Maleiwakai süpüla nii'iyatüinjatüin namüin na manoujainsaliikana süinain saja'lajaajeerüin tü nawashirüinkat so'u wane ka'i süpüla nnojolünjatüin na'waataain sulu'u. <sup>30-31</sup>Maa aka tü sümakat tü ashajünakat paala: "Anakaja nnojoliire ju'waataain sulu'u jukuaiippa. Anasü müleka shiale ju'waataain alu'u tü naa'inrakat chi Maleiwakai jümüin". Aneekuushi waya süpüla nüpüshinjanain Cristo Jesús, süpüla sütüjaainjachin naa'u

wayuu süpüshua sünnain niain Maleiwa atüjakai ma'i nümüiwa. Anajiraainapa waya nümaa Maleiwa nütüma Cristo, je akatannüinapa waya suulia waainjala sükajee tü naa'inrakat Cristo, saa'ujee niain aikkalaain süpüla awalaajaa waainjala süpüla taashinjanain waya suulia.

**2** <sup>1</sup>Tawalayuwaa, tantaiwa'aya jünainmüin süpüla taküjain nüchiki chi Maleiwakai jümüin, tü maküjuukat paala sümüin wayuu, nnojoiishi taya a'waataain sulu'u kekiwaa ju'upala je sulu'u keme'eriaa anüiki jümüin. <sup>2</sup>Shia tale'eru'uka ne'e tekirajünjatüin nüchiki Jesucristo jümüin sünnain nükachennüin sünnain kuruusakat süpüla ouktaa. <sup>3</sup>Mmoluwaasü taa'in jeema süka müin aka mamalainjeetkai saa'in jümüin tü taküjainjatkat achiki jümüin. <sup>4</sup>Nnojoiishii tekirajün jia maa aka nikirajia wane wayuu eekai nütüjain ma'i. Je nnojoiishii teme'ejuin aa'in jia süka pütchi eekai keme'eriain ma'i. Tountüin tee'iyatüin sünnain shiimüin tü taküjakat achiki jümüin, süka niain akaalinjün taya chi Naa'inkai Maleiwa Pülashikai. <sup>5</sup>Jütüjaa jumata saa'u sünnain jünoujashiin sünnainjee nüpülain chi Maleiwakai, nnojotsü sükajeejatüin keme'eriain tantüiki je nnojotsü sükajeejachin kekiin ma'i taya.

**Atüjaa nünainjee chi  
Naa'inkai Maleiwa**

<sup>6</sup>Na wayuu alaüle'etkana naa'in sünnain anoujaa, natüjaweerü aa'u tü tekirajakat anain sünnain shiain nünüiki chi Maleiwakai atüjakai ma'i. Nnojotsü shikiirujutüin wayuu ne'e manoujainsat, mayaashiije

kekiin naya naajün. Je nnojotsü nekiirujutüin na sülaülashiikana mma ne'e maa'ulu yaa. Mayaashiije kekiin naya naajün, amalajaweerü tü nekirajakat anain. <sup>7</sup>Tü tekirajakat anain, shiimüin sünnain shiain tü nünüikikat chi Maleiwakai atüjakai ma'i. Je paala, nnojolüiwa'aya sükumajünüin tü mmakat, nütüjaatüjüla aa'u Maleiwa tü naa'inrüinjatkat wamüin waya anoujashiikana so'uweena wane ka'i. Otta nnojotsü aküjünüin shia paala sümüin wayuu eekai manoujain. Ounjunnüsü suulia. Nücheküin chi Maleiwakai süpüleerua sükujününjatüin wamüin joolu'u süpüla watüjaainjatüin saa'u kojutüin waya nütüma. <sup>8</sup>Na sülaülashiikana mma manoujainsaliikana, nnojotsü nayaawatüin aa'u tü naa'inreekat chi Maleiwakai wamüin waya anoujashiikana. Müleka nayaawatüleje saa'u, nnojoiishije noponojün chi Senyotkai Jesucristo sünnain niain kojutüin ma'i nütüma chi Maleiwakai, je nnojoiishije nakacherüin sünnain tü kuruusakat süpüla ouktaa. <sup>9</sup>Shia tü ashajünakat achiki paala sulu'u tü karaloukta nüchikimaajatkat chi Maleiwakai:

“Tü kasa anasü yapatüjütkat nütüma chi Maleiwakai napüla na aikana apüla nia, nnojotsü aküjünüin achiki paala sümüin wayuu, je nnojotsü e'nnüin sümaa sütüjaanüin aa'u sütüma wayuu”.

<sup>10</sup>Otta joolu'u, ee'iyatünüsü shia wamüin nütüma chi Maleiwakai nükajee chi Naa'inkai.

Chi Naa'inkai Maleiwa, nütüjaa aa'ulu tü kasa jülüjakat saa'in

wayuu sainküin mmakat süpüshua. Nnojotsü shiain nütüjaain aa'u tia sümüiwa, nütüjaa aa'ulu süpüshua tü kasa jülüjakat naa'in chi Maleiwakai. <sup>11</sup>Nnojoiishi ein wane wayuu e'raajakai tü jülüjakat taa'in tale'eru'u tamüiwa. Müsia aka tü jülüjakat naa'in chi Maleiwakai, nnojoiishi ein wane wayuu atüjaakai saa'u. Nia ne'e atüjaaka saa'u chi Naa'inkai nümüiwa. <sup>12</sup>Tü shiimainkat ekirajünakat anain waya, nnojotsü shikiiru'ujeejatüin wayuu manoujainsat. Nia chi Naa'inkai Maleiwa nümüiwa ekirajaka waya sünain tü shiimainkat. Aapünüshi nia wamüin nütüma chi Maleiwakai süpüla wayaawatüinjatüin saa'u nütüma tü kasa anasü aapünakat wamüin, tü yapatüjtkat paala. <sup>13</sup>Je wanaa sümaa waküjün sümüin wayuu süchiki tü kasa anasü aapünakat wamüin, nnojoiishii aküjün waya süka pütchi wekiirujut ne'e, maa aka tü naashajaakat na manoujainsaliikana. Shia waküjaka achiki tü pütchi ekirajünakat anain waya nütüma chi Naa'inkai Maleiwa. Je na wayuu eekana ein namaa chi Naa'inkai Maleiwa, nayaawateerü aa'u tü waküjakat achiki sünain shiain nünüikin chi Maleiwakai. <sup>14</sup>Akaajasa na eekana nnojolin chi Naa'inkai Maleiwa namaa, nayouktüin tü pütchi wekirajakat anain, süka malaain shia saa'in namüin. Nnojotsü nayaawatüin aa'u, süka makaaliijuun naya sünain nütüma chi Naa'inkai Maleiwa. <sup>15-16</sup>Shia tü ashajünakat achiki paala:

“Nnojotsü wayuu ayaawatakat saa'u tü jülüjakat naa'in chi Maleiwakai

süpüla shikirajüinjachin nia sünain wane kasa”.

Alu'ujasa wayakana anoujashiikana, süka ein chi Naa'inkai Maleiwa wamaa, wayaawata aa'u tü kasa jülüjakat naa'in Cristo. Je saa'ujee nükaaliijün waya chi Naa'inkai Maleiwa, wayaawateerü aa'u tü pütchi süküjakat wayuu wamüin, müleka shiimüinre oo'ulaka alawaale shia. Je müleka mojule sünüiki wayuu wamüin sünain shiyujain wakuaiippa süka malaain tü waküjakat saa'in namüin, nnojoleerü kasajatüin wamüin sünüiki, süka watüjaain saa'u sünain shiimüin tü waküjakat.

#### Akatajirawaa sulu'u tü outkajaaleekat

**3** <sup>1</sup>Tawalayuwa, wanaa sümaa chajachin taya ja'aka, jo'uusu jaa'in sünain anoujaa nünain Cristo. Otta müsia joolu'u, ayatsia kee'ireein jaa'in tü kasa mojusü kee'ireekat naa'in na manoujainsaliikana. Je süka nnojoliin jüjüjün jia nümüin chi Naa'inkai Maleiwa, nnojotsü jiyaawatüin aa'u tü tekirajakat anain. <sup>2</sup>Tekirajünjese'e jia sünain tü shiimüinkat eekai mapüleein, süka isain jüchiki jüshatün eekai kapüleein. Ja'itakaja maa'ulu yaa, nnojoliyülia keraain jia süpüla ekirajünaa sünain kasa eekai kapüleein, <sup>3</sup>süka ayatün keejain jümüin tü kasa mojusü nale'eru'ukat na manoujainsaliikana. Aa'ayajiraashii jia sümaa juchunjiraain aa'in: <sup>4</sup>“Nikirajala taya Pablo”, müsü waneerua ja'aka. “Nikirajala taya Apolos”, müshii wane'eya sünain ju'waataain sulu'u jukuaiippa. Sukuaiippa wayuu manoujainsat tia juu'ulakakat.

<sup>5</sup> ¿Jamüshii ju'waataaka'a sulu'u takuaippa? ¿Jamüshii ju'waataaka'a sulu'u nukuaippa Apolos? A'yataalii ne'e waya nümüin chi Maleiwakai süpüla akaaliijaa jia süna'in ekeroloo süna'in anoujaa. Shia waa'inraka ne'e tü nuluwataakat anain waya chi Senyotkai wane'ewa'aire wakua süna'in wa'yataain nümüin. <sup>6</sup>Müshii aka waya saa'in wayuu eekai saa'inmajüin wane yüüja, maa aka ein chi apünajakai otta chi o'yonüikai wüin saa'u tü pünajütkat. Otta chi miyo'ukai atüma, nia chi Maleiwakai. Aka'aya tayakai, süka taküjüin paala nüchiki chi O'tte'erüikai jümüin, müshi aka naa'in chi apünajakai. Otta Apolos, süka nikirajüin jia tachikiru'u, müshi aka naa'in chi o'yonüikai wüin. Otta chi Maleiwakai, nia chi lotokai atüma tü jünoulakat. <sup>7</sup>Anakaja müleka kojutüle jütüma chi Maleiwakai wouliale'eya wayakana, mayaainje tayain e'ikajaan nüchiki Cristo jümüin, je mayaainje niain ekirajüin Apolos jia. Anashi kojutüle jütüma chi Maleiwakai, süka niain lotüin atüma tü jünoulakat. <sup>8-9</sup>Je wayakana wapüshua, shiimüin süna'in wakaaliijünüin nütüma chi Maleiwakai süna'in wa'yataain nümüin ja'aka. Awalaajüneena waya wane'ewa'aire wakua nütüma saa'u tü kasa anasü waa'inrakat nümüin. Mayaasüje nnojolüin wanaawain tü wa'yataakat anain ja'aka, maa aka nnojolüin wanaawain tü aa'innakat sulu'u wane yüüja, tü kee'ireekat waa'in wane'ewa'aire wakua, shia kojutüinjachin chi Maleiwakai jütüma süna'injee tü waküjakat jümüin je süna'injee tü waa'inrakat ju'upala.

Müshi aka taya saa'in wayuu eekai ku'yamalin miichi. <sup>10</sup>Maa aka sojoitünüin ipa mmolu'u palajana nütüma süpüla süikkalaain wane miichi, akaajaa tayakai süna'in taküjüin nüchiki Cristo chi O'tte'erüikai jümüin süpüla jünoujainjanain nünain. Tountüin taküjüin nüchiki, süka ni'yatüin chi Maleiwakai na'anasia tamüin. Je maa aka kojuyain wayuu süna'in akumajaa wane miichi, akaajaa jünain jiakana, eejana wane a'yataalii süna'in ekirajaa jia wanaa tamaa. Otta joolu'u jiakana a'yataaliikana cha'aya Corinto, shiainjatü jikirajaka anain waneepia tü shiimüinkat. <sup>11</sup>Müleka nnojoiere niain Cristo jikirajüin achiki, nnojoleena o'ttaain na aapajakana jünüiki. <sup>12-13</sup>Müleka jikirajüle süna'in tü nnojotkat kasain saamüin sümüin wayuu, atüjaaneerü aa'u so'u tü nükaliakat Cristo süna'in mojuin ma'i tü ji'yataainkat, süka mojuiteerüin so'u ka'ikat tia tü pütchi jikirajakat anain müinma'a, maa aka sa'ajaain wane miichi eekai sükumajuushin ne'e süka alama. Otta müleka jikirajüle süna'in tü shiimüinkat, atüjaaneerü aa'u so'u ka'ikat tia süna'in anain tü ji'yataainkat. Nnojoleerü mojuüin tü pütchi jikirajakat anain. <sup>14</sup>Müinka katsüinre sünoula tü aapajakat jünüiki sütüma tü jikirajakat anain, walaajeena jia nütüma chi Maleiwakai saa'u tü ji'yataainkat. <sup>15</sup>Akaajasa müleka nnojorule kasain saamüin namüin, nnojoleena jia walaain. Ja'itaina o'tte'enneenain jia, meena aka jia wane wayuu eekai shiyu'luushin sulu'ujee wane miichi jotüsü sümaa amüloulin sükorolo.

<sup>16-17</sup>Waya anoujashiikana sainküin mmakat süpüshua, aashin müin aka

waya saa'in tü miichi a'waajüleekat chi Maleiwakai, süka yaain chi Naa'inkai sulu'u waa'in wane'ewaيرة wakuu. Akatannüshii waya wapüshua nümüin chi Maleiwakai suulia waainjala. Je eere wane wayuu wakatajiraale tü wanoulakat nütüma, süsaleechi nia nütüma chi Maleiwakai saa'u tia.

<sup>18</sup> Jiakana jüpüshua, jalia jia suulia jünouja'alüin pütchi alawaa ne'e aküjünakat jümüin natüma na manoujainsaliikana. Kekiishii naya saa'in namüin. Nachekekakalaka wanaawain jia namaa sünnain kee'ireein jaa'in tü mojusukat. Otta jiakana, maa aka kekiweere jia, anakaja müleka jücheküle tü kasa anasü nüchekakat chi Maleiwakai jüpüleerua, mayaashiije sümalajüin jia wayuu. <sup>19</sup> Chi wayuu kekiikai so'ulu'u tü wayuu manoujainsatkalüirua, mala aa'inchi no'ulu'u chi Maleiwakai, maa aka tü ashajünakat achiki paala: "Chi e'rüikai wayümüin sümüin wayuu, mayaashiije kekiin naa'in nümüin, süsaleechi nütüma Maleiwakai".

<sup>20</sup> Je müsia wane ashajuushiya: "Chi eekai nu'waataain sulu'u kekiin so'ulu'u wayuu, nütüjaa aa'uchi chi Maleiwakai sünnain malaain tü nu'waataakat alu'u". <sup>21</sup> Je sükajee tia, anakaja juu'ulaale suulia ju'waataain nalu'u na ekirajüliikana, süka naa'inrüin chi Maleiwakai wainma kasa anasü jümüin. <sup>22-23</sup> Je nnojotsü naa'inrüin tia naa'ujee na ekirajakana jia. Naa'inrüin naa'ujee Cristo. Waya ekirajüliikana, maa aka tayakai, Apolos, oo'ulaka Pedro, ajütüüshi ne'e waya jünainmüin nütüma chi Maleiwakai süpüla wekirajüinjanain jia nüchiki Cristo chi Nüchonkai Maleiwa. Nia

Maleiwa nümüiwa chi talatakai atüma jaa'in süma'inru'u katüin jo'u je süpalapünaa ouktaa, süka jütüjaain saa'u sünnain eenjanain jia waneepia nümaa.

#### Na Aluwataaushikana nütüma Cristo

**4** <sup>1</sup> Je süka wajütüüshin jünainmüin nütüma chi Maleiwakai, anakaja müleka jüirakaale wamüin maa aka wane a'yataalii nümüin Cristo sünnain ekirajaa jia nüchiki chi Maleiwakai, tü maküjuukat paala sümüin wayuu. <sup>2</sup> Che'ojaasü tamüin taa'inrüin waneepia tü nuluwataakat anain taya chi Maleiwakai, maa aka na ajünalaakana wanaa tamaa. <sup>3-4</sup> Ja'itasüjaa mojuin sünnüiki wane wayuuirua ja'aka sünnain shiyoujain taya saaliijee tü ta'yataainkat nümüin Maleiwa, ja'itasüjaa mojuin nanüiki na süläülashiikana mma tamüin saaliijee, nnojotsü jamajatüin shia tamüin. Nnojotsü shiyaawatüin aa'u wayuu müleka analein je müleka mojule tü ta'yataainkat. Akaajaa tayaka'iya, mayaasüje'e anain saa'in tamüin tü ta'yataainkat nümüin Maleiwa, isasü tachiki tatüjaain saa'u. Nia chi Senyotkai Jesucristo nümüiwa atüjaaka saa'u. <sup>5</sup> Je sükajee tia, anakaja nnojorule mojuin jünüiki sünnain jiyoujain ni'yataain wane juwala nümüin Maleiwa süpülapünaa tü nükaliakat chi Senyotkai nüle'ejüinjatkat o'u. Nii'iyateerü so'u ka'ikat tia tü nale'eru'ukat na wayuukana napüshua, müleka analein je müleka mojule. Nieechi Maleiwa a'waajaka waya anoujashiikana so'u ka'ikat tia saa'u tü wa'yataainkat nümüin.

<sup>6</sup> Tawalayuwaa, anuu tashajüin jümüin tüü, süpüla jütüjaainjatüin

saa'u takuaippa sünain ta'yataain nümüin Maleiwa, oo'ulaka nukuaippaya Apolos, süpüla sütütülaain jaa'in sünain ji'yataain nümüin chi Maleiwakai. Aashin aluwataanayaain waya sünain kojutajiraain wane'ewaيرة wakua. Nnojotsü anain müleka kachekala'atalüi waa'in. <sup>7</sup>Nnojotsü jaralüin alanaain sünain anain suulia wane'eya no'ulu'u chi Maleiwakai. Müleka jütüjale süpüleerua wane kasa, shia süka jükaaliijünüin nütüma chi Maleiwakai, süpüla nnojoliinjanain ju'waataain sulu'u jukuaiippa, maa aka makaaliijujukai jia nütüma.

<sup>8</sup>Jiyouktüin, saa'in tamüin, ekirajünaa je aluwataanaa watüma, süka jülanaain woulia jaashin, müsia laülaayuuin jia jümüiwa jaashin. Kasataalejese shiimüin sünain laülaayuuin jia jümüiwa, jükaaliijeenaje waya. <sup>9</sup>Saa'in tamüin, e'itaanüshii waya Aluwataaushikana nütüma chi Maleiwakai su'upala tü wayuukolüirua süpüshua je tü yolujaakalüirua süpüshua, süpüla shime'eraipalainjanain waya, maa aka nü'ünüükai waya Maleiwa sünain ni'itaan waya süpüla ouktaa. <sup>10</sup>Mayaashiije nüpüshin waya Cristo wanaa jümaa, mojutsalii waya jütüma, süka nnojolüin kasain we'raajüin aa'u je malaain tü waküjakat achiki saa'in jümüin. Otta müshi'iyaa jiakana, a'waataashii jia sulu'u jukuaiippa sünainjee katsüin jaa'in sünain anoujaa, je sünainjee kekiin jia jaashin. <sup>11</sup>Mayaainje wa'yataain waneepia nümüin chi Maleiwakai, mojutsalii waya sütüma wayuu wainma sünain shi'rülüin wayümüin wamüin. Mepiasalii waya. Waraittühii waya sümaa

jamü, münyaasü, otta mojuu ashe'in sünain aküjaa nüchiki chi O'tte'eriükai. <sup>12</sup>A'yataashii waya waneepia süpüla tü weküinjatkat aa'u. Mayaainje mojutüin waya sütüma wayuu, waa'inrüin tü anasükat sümüin. Müleka shi'rüle wayümüin wayuu wamüin, achuntühii waya wane anaa nümüin chi Maleiwakai saa'u. Müleka jashichuukale wamüin sünainjee waküjain nüchiki Cristo, wachecherüin waa'in süpüla. <sup>13</sup>Je müleka mojule sünüiki wamüin wojuuna, anashii waya sümüin. Mayaainje wa'yataain nümüin chi Maleiwakai, ayatshi'iyaa waya mojutüin sütüma wayuu, maa aka saa'in wane wasuura ojutünakat ne'e.

<sup>14</sup>Tawalayuwa, tamüsü jümüin tüü saa'u alin jia tapüla maa aka naa'in wane tachooin. Nnojotsü tashajüin jümüin süpüla taapülüjüinjanain jia süka. Süpülajatü süchiajaainjanain jia suulia jüüjüüjüin jia namüin na wayuu eekai pülain naa'in woulia waya Aluwataaushikana. <sup>15</sup>Mayaashiije wainmain na aa'inmajüshiiikana jia sünain tü jünoulakat nünain Cristo, waneeshia ne'e jüshi, nia chi akaaliijakai jia paala jikeroloiwa'aya sünain anoujaa. Taya jüshika'aya sünain tü jünoulakat, süka tayain aküjain palajana jümüin nüchiki chi O'tte'eriükai. <sup>16</sup>Je sükajee tayain müin aka naa'in wane jüshi, tachuntüin jümüin süka süpüshua taa'in jüshatüinjatüin tü tanoulakat nünain Cristo. <sup>17</sup>Je joolu'u, süpüla takaaliijain jia sünain ashataa takuaippa, taluwataajeechi Timoteo jünainmüin. Aishi ma'i nia tapüla, müshi aka nukuaippa wane tachon



tamiin. Saa'u naa'inriin waneepia tü nuluwataakat anain chi Senyotkai, nüso'ireerü jaa'in sünnain tü takuaippakat sünnain anoujaa nünain Cristo Jesús. Je tü tekirajakat anain sulu'u tü outkajaaleekat sainkiin mmakat süpüshua, shia tü taa'inrakat waneepia.

<sup>18</sup>Tamüshii paala jia soo'opünaa nakuaippa na wayuu pülakana aa'in woulia waya Aluwataaushikana, na a'waataakana sulu'u nakuaippa. Müichijachiya male'ejüin taya jünainmüin naashin. <sup>19</sup>Müleka nücheküle tapüleerua chi Senyotkai, o'üneechi taya maalü jünainmüin süpüla tatüjaainjatüin naa'u nayakana müleka nukajatüle chi Naa'inkai Maleiwa tü naashajaakat, müleka pütchire ne'e nale'eru'ujejatü. <sup>20</sup>Tü na'waataakat alu'u, nnojotsü shiain süchiki nukuaippa chi Maleiwakai sünnain aluwatawaa je sünnain pülashin nia süpüla o'tte'eraa wayuu. <sup>21</sup>¿Jameerü saa'in jümüin takuaippa tantapa jünainmüin? Müleka noo'ulaale na wayuukana suulia pülaa aa'in, kamaneejechi taya namüin. Akaajasa nnojorule noo'ulaain suulia, jashichechi taya namüin.

#### Nüchiki chi wawala kaainjalakai

**5** <sup>1</sup>Taapa achiküi waneeshia ja'aka sünnain nu'luwajiraain nukuaippa sümaa wayuu jierü, tü nu'wayuusekat chi nüshikai. Kasalajanasü tia saa'innüle sa'aka tü manoujainsatkalüirua, süka mojuhaatain ma'i shia. <sup>2</sup>Atak, nnojotsü mojuin saa'in jümüin tü naa'inrakat chia wayuukai, aashin wayuuin anashii ma'i jia jaashin. Anakaja müleka jujuittirüle chi wayuukai ja'akajee

jia anoujashiikana sulu'u tü outkajaaleekat cha'aya Corinto.

<sup>3</sup>Mayaainje nnojolin taya chain jümaa, jülüjashii jia taa'in. Je mojusü tamüin tü naa'inrakat chia wayuukai, maa aka eekai taya cha'aya jümaa. <sup>4-5</sup>Tamüshii paala jia sükajee tia: Wanaa sümaa jutkatüin jia a'waajüshiikana chi Wasenyotsekai Jesucristo, anakaja müleka jaapüle chi kaainjaraiakai najapulu'u Satanás süka nünülia Jesucristo, süpüla nuu'ulaainjachin suulia naainjala. Ja'itaichi amülouleechin paala nia nütüma chi Yolujaakai, o'tte'enneechia ne'e nütüma chi Wasenyotsekai Jesucristo so'uweena tü ka'i niitaajeekikai o'u.

<sup>6</sup>A'waataashii jia sulu'u jukuaippa sünnain anain sümaa yalataain wane juwala sümaa kaainjalaa. Nnojotsü anain tia. Müleka nnojoliin jüchiaain joolu'u chia wayuukai suulia naainjala, ki'reerü jümüin machiaalaa na juwalayuukana suulia kaainjalaa. <sup>7</sup>Saa'u jukatannüinapain nümüin chi Maleiwakai suulia jaainjala, anakaja kasalajanale jütüma aainjalaakat süpüshua eekat ja'aka. Soto jaa'in nakuaippa na judíokana paala sümaiwa. Sünnain nemi'ijaain tü "Pascuakat" anülia, no'utirapü'tü aa'inchi wane anneetchon saa'u naainjala na wayuukana. Otta müshia Cristo maa'ulu yaa sünnain nu'utinüin aa'in saa'u waainjala, müshi aka naa'in chia anneetchonkai. <sup>8</sup>Je sükajee süla'ajaanüitpain woulia waainjala, anakaja müleka woo'ulaale suulia kaainjalaa, suulia kanainjiraain waya waa'in, je suulia wa'waataain sulu'u wakuaiippa. Shia wa'waataweeka alu'u süpüshua

tü kasa anasü naa'inrakat Cristo wamüin.

<sup>9</sup>Je sulu'u tü karaloukta tashajakat paala jümüin süpüleerua tüü, taluwataain jia süinain jükatalaainjanain noulia na wayuu eekai na'luwajiraain nakuaippa sümaa wayuu jierü otta wane jierü nümaa wane tooo. <sup>10</sup>Otta na kaainjaralii tashajakana achiki jümüin, nnojoliishii nayain na manoujainsaliikana. Müleka nayaleje jükatalaainjanain oulia na manoujainsalii kaainjaraliikana, acheküin jükatalaain sa'akajee wayuu süpüshua. Süka jamüin, wainma na manoujainsaliikana eekai na'luwajiraain nakuaippa sümaa wayuu jierü otta wane jierü nümaa wane tooo, eekai washireein ma'i naa'in, eekai kemeeraliin sükorolo wayuu, je eekai kamaleiwaseyaain. <sup>11</sup>Na jükatalaainjanakana oulia, naya na juwalayuukana eekai na'luwajiraain nakuaippa sümaa wayuu jierü otta wane jierü nümaa wane tooo, eekai washireein ma'i naa'in, eekai kamaleiwaseyaain, eekai mojuin nanüiki sujuuna wayuu, eekai neperülüin, je eekai kemeeraliin sükorolo wayuu. Anashii jükatalaale noulia ja'itaina jia neenakirüin süinain wane ekawaa namaa.

<sup>12-13</sup>Waya anoujashiikana, nnojoliishii e'itaanüin süpüla we'rajüinjatüin saa'u naainjala na manoujainsaliikana. Nieechi Maleiwakai kasalajanaka atüma namüin. Shia e'itaanaka apüla waya kasalajanainjatüin watüma naainjala na wawalayuukana, maa aka tü sümakat tü ashajünakat paala: "Jujüttira jümaala chi kaainjaraikai ja'akajee".

### Akumajaa sukuaippa tü o'ttaakat

**6** <sup>1</sup>Jiakana anoujashiikana, müleka ni'rüle wayümüin wane juwala jümüin, çaluwataajeena jia wane pütchipü'ü sümaa jünüiki sümaa jümaünajiraain no'upala na manoujainsaliikana? çJamüshii nnojoliika'a jukumajüin sukuaippa tia no'upala na anoujashiikana ne'e namüiwa? <sup>2</sup>Soto jaa'in süinain wayeenain anoujashiikana kasalajanain atüma saainjala wayuu manoujainsat süpüshua so'uweena wane ka'i. çJamataaka'a joo jia süpüla isain jüchiki akumajaa sukuaippa kasa eekai sülatüin jümüin? <sup>3</sup>Nnojo motüin jaa'in süinain wayeenain aapünüin amüin shikii tü yolujaakalüürua so'uweena ka'ikat tia. çShiaka ma'i isematüin jüchiki akumajaa sukuaippa kasa o'ttaakat jümüin? <sup>4</sup>Akaajasa joolu'u, müleka ni'rüle wayümüin wane juwala jümüin, çjamakuaippatsa'a juluwataaka'a wane pütche'ejachi manoujainsai nünainmüin chi juwalakai? <sup>5</sup>Tüü, süpülatatü aapülijia jia. çShiataapa süka nnojolin ein ja'aka eekai nütüjain süpüleerua akumajaa sukuaippa tü o'ttaakat jümüin? <sup>6</sup>Mojusü ma'i taa'in süka jümaünajüin namüin na juwalayuukana no'upala na manoujainsaliikana.

<sup>7-8</sup>çJamüshii jia machecherüinka'a jaa'in soo'opünaa ni'rala wayümüin chi juwalakai jümüin saa'u nimeejüin jükorolo? Tü maünaakat ja'aka jia anoujashiikana, suchiiruajatü akanajaa neerü nanainjee na juwalayuukana. Nnojotsü anain tia no'ulu'u chi Maleiwakai, süka nnojoliin aijiraainjanain jia maa aka tü nuluwataakat anain jia.

<sup>9</sup>Aashin jütüjaain saa'u tü wayuu kaainjaratkalüirua, müiria nnojolüin ekerolüin nüma'anamüin chi Maleiwakai eere nuluwataain. Nnojoleerü ekerolüin na wayuu eekai nu'luwajiraain nukuaippa sümaa wayuu jierü otta wane jierü nümaa wane toolo, je na wayuu kamaleiwaseyaashiikana, je na wayuu eekai nama'üjaain sümaa wayuu nnojotkat nu'wayuusein otta nnojokai su'wayuusein, je na tooloyuu ama'üjiraakana sümaa toloyuu. <sup>10</sup>Jalia jia majayaa aka sukuaippa tü wayuu kaainjaratkalüirua sünnain ka'ruwaraliin jia, sünnain kee'ireein jaa'in washirüü, sünnain jiperüliin, sünnain mojuin jünüiki sujuuna wayuu, je sünnain jimeejüin sükorolo wayuu. Müleka jaa'inrüle tia, shiimüin sünnain nnojoleenain jikerolüin nüma'anamüin chi Maleiwakai eere nuluwataain. <sup>11</sup>Shia tü naa'inrapü'ükat waneerua ja'aka paalanka. Otta müshi'iya joolu'u jia, ala'ajaanütpa jaainjala juulia, je akatannüinapa jia suulia nüümüin chi Maleiwakai. Je anajiraainapa jia nümaa chi Maleiwakai nütüma chi Naa'inkai sünnainjee tü naa'inrakat chi Senyotkai Jesucristo.

**A'luwajirawaa akuaippaa  
sümaa wayuu jierü**

*otta wane jierü nümaa wane toolo*

<sup>12</sup>Otta naashin wane wayuukana cha'aya ja'aka, taashishii naya süpüla naa'inrüin kasa eekai ein ne'e. Otta saa'in tamüin, müleka nnojorule kasain saapiin jümüin tü jaa'inrakat, anakaja müleka juu'ulaale suulia. Je jalia jia süchepchiajayaa tü kasa jaa'inreekat

ma'i. <sup>13</sup>Saashin tia wayuukolüirua, nnojotsü mojuin nüümüin chi Maleiwakai a'luwajirawaa akuaippaa sümaa wayuu jierü otta wane jierü nümaa wane toolo, maa aka ne'e saa'in tü eküülü wekakat sünnain nnojolüin mojuin nüümüin, süka ni'itaalain wapüla süpüla weküinjatüin shia süpüshua. Otta tü tamakat joolu'u jümüin, nnojoliishii akumajuushin waya süpüla a'luwajirawaa wakuaippa sümaa wayuu jierü otta wane jierü nümaa wane toolo. Shia e'itaanaka apüla waya kojütüinjachin chi Senyotkai wattüma süka wakuaippa, süka niain laülaashin waa'u. Nnojomotüin jaa'in sünnain saja'tteerüin mapeena tü we'irukukat je tü eküütakat süpüshua nütüma chi Maleiwakai. <sup>14</sup>Je so'luweena wane ka'i, oso'iraajeerü waa'in nütüma chi Maleiwakai Pülashikai ma'i, maa aka naa'in chi Senyotkai paala nüso'iraain aa'in nütüma süchikjee ouktaa. <sup>15</sup>Soto jaa'in sünnain nüpüshinapain jia Cristo, je nücheküin süpüleerua kojütüinjachin nia jütüma süka jukuaippa. ¿Jamakuaippalüinjatü süpüla jüsütaan joolu'u nuulia Cristo süpüla jaapiinjatüin jukuaippa sümüin wane wayuu maa'insat? Shiimüin sünnain mojutechin nia jütüma müleka jaa'inrüle tia. <sup>16</sup>Chi eekai nüma'üjaain sümaa wane maa'insat, waneesia ne'iruku, maa aka sümakat tü ashajuushikat: "Wane wayuu sümaa nu'wayuuse, a'aniraasü nakuaippa". <sup>17</sup>Alu'ujasa jiakana, müleka jaapüle jukuaippa nüümüin chi Senyotkai süpüla nümaainjanain jia, wanaawajiraweerü jaa'in nümaa. <sup>18</sup>Jalia jia suulia ju'luwajiraain jukuaippa sümaa wayuu jierü otta

wane jierü nümaa wane tooo. Maa aka een aainjalaa eekai nnojoliün kachajaalain ji'iruku sütüma, akaajasa müleka ju'luwajiraale jukuaippa sümaa wayuu jierü otta wane jierü nümaa wane tooo, shiimüün sünain kachajaaleerüün ji'iruku sütüma. <sup>19-20</sup>Nnojotsü anain müleka jaa'inrüle tü jüchekakat ne'e jümüüwa, alu'ujasa shiale jaa'inrüün tü nüchekakat chi Maleiwakai jüpüleerua, süka een chi Naa'inkai sulu'u jaa'in wane'ewa'ire jukua, chi aapünakai nütüma chi Maleiwakai jümüün. Nuwalaajüün Cristo tü jaainjalakat süka tü nüshakat ouktapa nia, süpüla nüpüshinjanain jia, je süpüla kojütüinjachin chi Maleiwakai jütüma süka ji'iruku.

#### Soo'opünaa ka'wayuusee

**7** <sup>1</sup>Saa'u tü jüshajakat achiki tamüün soo'opünaa müleka anale tü ma'wayuuseekat, tamüsü paala jümüün: anasüyaaje'e tü ma'wayuuseekat. <sup>2</sup>Shiasa süka joulüün ma'i a'luwajirawaa akuaippaa sümaa wayuu jierü otta wane jierü nümaa wane tooo, chi eekai nücheküün ka'wayuusein, anashi müleka ka'wayuuserere. Je wane jierü, müleka sücheküle keechinyüü, anasü müleka keechinre. <sup>3-4</sup>Chi a'wayuuseekai, anakaja müleka nnojoiere niyouktüün ainkawaa sümaa tü nu'wayuusekat, ja'itakaje tü jietkat nümaa chi su'wayuusekai. Nnojotsü laülaain tü jietkat saa'u sukuaippa sümüüwa, nia chi su'wayuusekai laülaaka saa'u. Maa'aya aka chi a'wayuuseekai, nnojoiishi laülaain saa'u nukuaippa nümüüwa, shia laülaaka tü jietkat saa'u. Wanaawashii naya sünain laülaajirawaa saa'u nakuaippa.

<sup>5</sup>Müleka paa'inwajiraale jia sünain nnojoliün jainkaain sümaa ju'wayuuse süpüla aashajawaa kama'alu'u nümaa Maleiwa, anasü tia. Nnojo jülatirüün wainma ka'i suulia ju'wayuuse suulia nüma'ülalajüün jia Satanás saa'ujee tia. Tashajüün tüü jümüün süka jo'uweein jaa'in. <sup>6</sup>Müleka ka'wayuuserere jia, anasü tia, suulia kaainjalain jia nütüma Satanás. Nnojoliishii ta'alijain jia suulia ka'wayuusee suulia "nüsirü taya" jümajüün tamüün. <sup>7</sup>Kasataalejese müün aka taa'in na anoujashiikana napüshua sünain nnojoliün kee'ireein naa'in ka'wayuusee. Otta tatüjaa aa'ulu sünain nnojoliün wanaawain wayakana anoujashiikana. Eeshii eekai e'itaanüün nütüma chi Maleiwakai süpüla müinjanain aka takuaippa. Oo'ulaka wane, nnojo.

<sup>8</sup>Otta jiakana tooloyuu je jieyuu ouktakana a'wayuuset, oo'ulaka jia ma'wayuusesaliikana, anasüyaaje'e müleka ayatüle jia jümüüwa'ain maa aka tayakai. <sup>9</sup>Otta müleka kee'ireere jaa'in ka'wayuusee, anashii müleka ka'wayuuserere jia suulia müliajüün jaa'in sütüma.

<sup>10</sup>Je tü tashajüünjatkat joolu'u, nnojotsü tanüüküün ne'e, shia tü nuluwataakat anain chi Senyotkai jümüünjatü jiakana ka'wayuuseshiikana. Jiakana jieyuukana, nnojo jükatalaain nuulia ju'wayuuse. <sup>11</sup>Otta müleka jükatalaale nuulia sümaa nnojoliün jiiataweein jüchikua nümaa, ayatüünjana jia sünain ma'wayuusee. Acheküishi jiiite'erüün nia nüchikua. Otta jiakana tooloyuukana, nnojo juu'ulaain suulia ju'wayuuse.

<sup>12</sup>Je tü tashajüünjatkat joolu'u, jümüünjatü jiakana

ka'wayuuseshiikana wayuu manoujainsat. Tüü, tanüiki ne'e, nnojotsü paala nikirajüin anain chi Senyotkai. Saa'in tamüin, müleka nnojorule sünoujain nu'wayuuse wane wayuu wanaa nümaa, je müleka ayateere shia nümaa, anakaja müleka nnojorule nuu'ulaain shia. <sup>13</sup>Je müleka nnojore nünoujain su'wayuuse wane wayuu wanaa sümaa, je müleka ayateere nia sümaa, anakaja müleka nnojore suu'ulaain nia. <sup>14</sup>Wane wayuu manoujainsai, ka'wayuusere wane anoujasü, anashi nia sünainjee na'akain na nüchooinkana chi Maleiwakai. Mataaja'a wane wayuu manoujainsat, ka'wayuusere wane anoujashi, anasü shia sünainjee na'akain na nüchooinkana chi Maleiwakai. Je anashii na nachooinkana na wayuukana sünainjee na'akain na nüchooinkana chi Maleiwakai. Müleka nakatannüle noulia na anoujashiikana, çjaraleerü akaaliijaka naya sünain tü nanoulakat?

<sup>15-16</sup>Tawalaa, çpütüjaaka naa'u pükanajeechin pu'wayuusekai nüümüin Maleiwa müleka ayatüle nia pümaa? Müleka nu'uneere, nnojo pa'aliijain nia. Nnojotsü kepin püma'ana. Nnojotpaja nücheküin chi Maleiwakai süpüleerua pütkaain nümaa shii'iree makatüinjachin pümaa. Mataaja'a wane anoujashi, nnojotsü nütüjaain aa'u müleka nükanajeertüin tü nu'wayuusekat nüümüin Maleiwa müleka ayatüle shia nümaa. Akaajasa su'uneere, nnojotsü kasain naa'inrüinjatüin süpüla makatüinjatüin nümaa.

<sup>17</sup>Anakaja müleka ayatüle jia maa akaapü'tü wanaa sümaa jeenakünüin paala nütüma chi

Maleiwakai süpüla jünoujain nüünain Cristo, süka shia'inya naapajalain chi Maleiwakai jümüin. Anakaja müleka nnojoliire jii'iratüin joolu'u jukuaiippa. Shiaale tü taluwataakat anain tü anoujasükalüirua sulu'u tü outkajaaleekat süpüshua. <sup>18</sup>Müleka jiale “na o'yotoonakana ata” jümaiwa, anakaja müleka nnojoliire jii'iratüin joolu'u jukuaiippa shii'iree “na mo'yotooju atachii” jümüneein. Je müleka jiale “na mo'yotooju atachii” münakat, anakaja müleka nnojoliire jii'iratüin joolu'u jukuaiippa shii'iree “na o'yotoona atachii” jümüneein. <sup>19</sup>Mayaashijje jia in na o'yotoonakana ata, mayaashijje jia in na mo'yotooju atachiikana, nnojotsü jamajatüin tia nüümüin chi Maleiwakai. Shia anaka alu'u jaa'inrüle waneepia tü nuluwataakat anain chi Maleiwakai. <sup>20</sup>Acheküsü ayatüinjatüin tü jukuaippakat paala wanaa sümaa jeenakünüin paala nütüma chi Maleiwakai. <sup>21</sup>Müleka piunale jia wanaa sümaa jeenakünüin, nnojo mojuin jaa'in sütüma tia. Otta müleka saapünüle taashii jümüin nütüma chi kachepchiakai jia, o'üneenaja nüma'anajee. <sup>22</sup>Chi eekai piunain wanaa sümaa neenakünüin nütüma chi Senyotkai, mayaashijje ayatüin piunain nia, müichipa aka taashikai naa'in süpüla ni'yataain nüümüin Cristo. Je chi eekai nnojolin piunain wanaa sümaa neenakünüin, eechipa joolu'u wane a'yataai nüümüin Cristo. <sup>23</sup>Taashiinapa jia suulia jaainjala sünainjee suwalaajünüin jaainjala nütüma Cristo. Je nnojoliinjana aluwataanüin jia joolu'u sütüma wayuu, niainjachi aluwataaka jia chi Maleiwakai nüümüiwa.

<sup>24</sup>Tawalayuwaa, müshi taya jümüin tachikua: Süma'inru'u jiyataain nümüin Cristo, anakaja müleka nnojoliire jii'iratüin tü akuaippaa jüma'اناتüjütkat wanaa sümaa jeenakünüin paala nütüma chi Maleiwakai.

<sup>25</sup>Je saa'u tü jüshajakat achiki tamüin soo'opünaa jamüinjatüin jiakana ma'wayuusesaliikana, tamüsü paala jümüin: Sükajee nümüliajüin taya chi Senyotkai, nuluwataaka taya jünainmüin. Anashii müleka jaapüle tü taküjeetkat joolu'u jümüin. Tamüshii ne'e jia: Nnojotsüyaaje nümajalain tamüin chi Senyotkai. <sup>26</sup>Saa'in tamüin, anakaja müleka ayatüle jia jümüiwa, süka wainmain tü müliaa we'arakat waya anoujashiikana maa'ulu yaa sainküin mmakat.

<sup>27</sup>Chi wayuu eekai ka'wayuusein, anashi müleka nnojoiere nu'uulaain tü nu'wayuusekat. Je chi eekai ma'wayuusein, anashi müleka nnojoiere nüchajaain süchiki ka'wayuusee. <sup>28</sup>Otta müleka ka'wayuuserere nia, nnojotsü kaainjalaaain tia. Maa'aya aka wane jierü eekai ma'wayuusein, müleka ka'wayuuserere shia, nnojotsü kaainjalain. Tamüshii jia süka koo'omüinjüin jümüin tü müliaakat müleka jüchajaale ka'wayuusee.

<sup>29</sup>Tawalayuwaa, jülüja jaa'in tü taküjüinjatkat joolu'u jümüin. Jia ka'wayuuseshiikana, süma'inru'u jaa'inmajüin na ju'wayuusekana, anakaja müleka jiyataale nümüin chi Maleiwakai süka süpüshua jaa'in, süka saja'tteerüin maalü tü wakalia wa'yataainjatkat o'u nümüin chi Senyotkai. <sup>30</sup>Je jiakana alapajüshiikana, anakaja müleka nnojoliire kakaliain jia sünain

alapajaa. Jia emi'ijashiikana, anakaja müleka nnojoliire kakaliain jia sünain emi'ijaa. Jia ayalajülüikana, anakaja müleka nnojorule jaa'inanin ma'i waneepia tü jükorolokot. <sup>31</sup>Jia washinnuu oikkaaliikana korolo, nnojoo jaa'inanin ma'i waneepia tü washirü'ireekat. Shiimüin sünain saja'lajaajeerüin tü mmakat je tü washirüütakat süpüshua so'uweena wane ka'i.

<sup>32</sup>Tashajüin jümüin tüü, süka tacheküin süpüleerua nnojoliinjanain jüshapataain aa'in saaliijee kasa wainma. Wane wayuu anoujashi eekai ma'wayuusein, jülüjüsü waneepia naa'in tü nüchekakat chi Senyotkai nüpüleerua, je naa'inreein ma'i tü nuluwataakat anain nia. <sup>33</sup>Akaajasa wane eekai ka'wayuusein, shia jülüjaka ne'e naa'in waneepia tü ni'yataainkat otta müsia tü talatüinjatkat atüma saa'in tü nu'wayuusekat. <sup>34</sup>Kapülejeerü nümüin aa'inraa tü nüchekakat chi Senyotkai nüpüleerua, süka jülüjain naa'in waneepia tü naatajatkat suulia. Maa'aya aka wane anoujasü ka'wayuusesü, jülüjasü ne'e saa'in waneepia tü shi'yataainkat anain je tü talatüinjatkat atüma naa'in chi su'wayuusekai. Akaajasa wane anoujasü eekai ma'wayuusein, je wane eekai ouktüin su'wayuuse, jülüjasü naa'in waneepia tü nüchekakat chi Senyotkai napüleerua, je naa'inreein süka süpüshua naa'in tü nuluwataakat anain naya. <sup>35</sup>Tü tamakat jümüin, nnojotsü süpülajatüin ata'ülia jukuaiippa, süpülajatü takaaliijüinjanain jia sünain jaa'inrüinjatüin süka süpüshua

jaa'in tü anasükat nüchekakat chi Senyotkai jüpüleerua.

<sup>36</sup>Wane wayuu, müliale shii'iree wane majayüt eekai kettaairiün sükalia süpüla ka'wayuusee, müleka ka'wayuuserere ma'i naa'in, anakaja nu'wayuuserere shia. Nnojoiishi kaainjalain süka tia. <sup>37</sup>Akaajasa müleka nuuntule achecheraa naa'in sümaa ma'wayuusee, nnojotsü mojuin müleka ma'wayuuserere nia. <sup>38</sup>Müleka nu'wayuuserere tü nümüraajuinkat, nnojotsü mojuin tü naa'inrakat. Otta müleka ayatüle nia sünain ma'wayuusee, saa'in tamüin, alana'aleesia sünain anain tü naa'inrakat.

<sup>39</sup>Wane jierü, kataiwa'aya no'u chi su'wayuusekai, nnojotsü anain süpüla ka'wayuusein wane naata nuulia. Müleka ouktüle nia, nnojotsü mojuin ka'wayuuserere shia süchikua. Chi su'wayuuseinjachikai, niainjachi wane wayuu anoujashi. <sup>40</sup>Otta saa'in tamüin, alana'aleejeeria sünain talatüin müleka ayatüle shia sünain ma'wayuusein. Tamüsü tüü süka ein chi Naa'inkai Maleiwa tamaa.

**Tü aapünakat sümüin tü maleiwayaasükalüürua**

**8** <sup>1</sup>Saa'u tü jüshajakat achiki tamüin soo'opünaa tü ekawaakat shi'iruku mürüt aapünakat sütüma tü manoujainsatkalüürua sümüin tü sümaleiwaseyaasükalüürua, anuu tü tamüinjatkat jümüin: Püla aa'inchi waneerua anoujashiikana ja'aka noulia na nawalayuukana. Saa'in namüin, natüjaa aa'ulu tü anasükat süpüla naa'inrüin, süka natüjaain saa'u sünain nnojolin Maleiwain chi aapünakai amüin tü shi'irukukat mürüt. Akaajasa müleka

shiimüinreje sünain ajjiraain jia jüpüla, akaaliijiraajeena jüpüshua sünain tü jünoulakat. <sup>2</sup>Chi eekai nu'waataain sulu'u kekiin ma'i nia naashin, nnojoyülia yalayalain sünain anoujaa. <sup>3</sup>Otta chi eekai shiimüin sünain alin apüla chi Maleiwakai, e'nnaajünüshi nia nütüma süka nüpushin nia.

<sup>4</sup>Shiimüin tü jümakat: Nnojoiishi Maleiwain chi aapünakai amüin tü shi'irukukat mürüt. Watüjaa aa'uchi chi Wamaleiwasekai sünain niain waneeshin Maleiwain. <sup>5</sup>Mayaasüje wainmain tü maleiwayaasükalüürua chakat iipünaa oo'ulaka tü yaasükat mmolu'u, je mayaasüje kojutüin shia sütüma wayuu manoujainsat, <sup>6</sup>watüjaa aa'uchi chi Wamaleiwasekai sünain niain waneeshin Maleiwain. Nia Washika'aya, chi kama'anaje'ewaikai kasa süpüshua, chi kojutkai watüma nümüiwa. Otta müshia Jesucristo, watüjaa aa'uchi sünain niain waneeshin Wasenyotsein. Nia chi aapakai kataa o'u sümüin wayuu, chi kakumajalakai kasa süpüshua. <sup>7</sup>Otta ja'aka jia anoujashiikana cha'aya Corinto, eeshii eekai nnojoyüliain katsüin naa'in sünain anoujaa. Isayülia nachiki nayaawatüin saa'u sünain nnojolüinjatüin kasajatüin wane maleiwayaasükat nümüin wane anoujashi. Je müleka nikeere tü aapajuushikat sümüin tia maleiwayaasükalüürua, yarütteerü naa'in sütüma saa'u pülain shia naashin, süka sotoyülü'inia naa'in tü maleiwayaasü nünoujapü'ükalüürua anain paala.

<sup>8</sup>Otta jünüiki tamüin: “Nnojotsü shiain tü wekakat wountaka atüma wanaawajiraain waa'in nümaa chi

Maleiwakai. Müleka weküle wane eküülü, nnojoliijeena alana'aleeinya waya sünain kojutüin nütüma chi Maleiwakai sünainjee tü ekawaakat. Je müleka nnojorule weküin shia, nnojoleena mojutüin waya nütüma saaliijee meküin". <sup>9</sup>Shiimüin tü jümakat. Laülaa jia jümüiwa süpüla ekaa tü aapajuushikat sümüin tü maleiwayaasükalüirua. Acheküshi niain soteein jaa'in chi matsüinkai aa'in sünain anoujaa, suulia sümalaja'alaain tü nünoulakat sütüma tü jaa'inrakat nu'upala. <sup>10</sup>Jütüjaa aa'ut sünain nnojolin Maleiwain chi aapünakai amüin tü shi'irukukat mürüt. Akaajasa chi juwala matsüinkai aa'in sünain anoujaa, müleka ni'rüle jia sünain jiküin sulu'u tü a'waajüleekat tü maleiwayaasükat, eesü süpüla nüshatüin tü ekaakat wanaa jümaa. Isasü eera nüchiki niyaawatüin saa'u müleka anale tü naa'inrakat, shiataapa müleka mojule. <sup>11-12</sup>Mayaasüje nnojoleerüin amalajaain tü jünoulakat sütüma tü jaa'inrakat, eeshi süpüla sümalajaajeerüin nünoula chi juwalakai matsüinkai aa'in süpüla nuu'ulaain nuulia Cristo chi ouktakai naa'ujee. Kaainjalashii jia nuulia chi juwalakai saaliijee tia, otta nuulia Cristo. <sup>13</sup>¿Kasa anaka süpüla waa'inrüin? Müleka sümalajaajeere nünoula wane wawala saa'ujee wane kasa waa'inrakat nu'upala, anakaja müleka nnojorule waa'inrüin shia piantua.

#### Nukuaippa wane Aluwataaushi

**9** <sup>1</sup>Eeshii waneeirua eekai ayoujain tü ta'yataainkat nümüin Cristo. Anii taya asouktüin joolu'u shi'ipajee tü namakat

tachiki: Mayaainje nnojolin eejachin taya nümaa chi Wasenyotsekaí Jesucristo maa aka na polookana piämmüin Aluwataaushikana, shiimüinpaja sünain te'rüin nia. Je sünainjee takaaliijain jia sünain ekeroloo sünain anoujaa nünain chi Senyotkai, jütüjaa aa'ut sünain shiimüin tayain wane Aluwataaushikai. Je laülaashi taya tamüiwa sünain tü ta'yataainjatkat nümüin chi Maleiwakai. <sup>2</sup>Jiakana, jütüjaa aa'uchi taya sünain tayain wane Aluwataaushikai, mayaashije nnojolin tayain wane Aluwataaushikai saajüin tia wayuukolüirua ja'akakat. Ne'rapa tü jünoulakat sümaa natüjaain saa'u sünain tayain chi ekirajakai jia, nayaawateechi aa'u taya so'uweena wane ka'i sünain tayain Aluwataaushin nütüma Cristo.

<sup>3</sup>Anuu tü taküjakat ne'ipajee na mojukana anüiki tachiki: <sup>4</sup>¿Nnojoliishijasa anain waya süpüla walawaa jütüma süpüla wekinnüin je wasinnüin saa'ujee wa'yataain ja'aka nümüin chi Senyotkai? <sup>5</sup>Je sünain waküjain nüchiki Cristo sainküin mmakat süpüshua, ¿nnojoliishijasa anain waya süpüla saapüünüin wamüin süsapia tü wa'wayuusekat süpüla o'unaa wamaa, maa aka nümüin Pedro je napüshi na Aluwataaushikana oo'ulaka nimüliayuu chi Senyotkai? <sup>6</sup>Tayakai nümaa Bernabé, wanaa sümaa waküjain nüchiki Cristo sümüin wayuu, ¿jamüshiisa wa'yataaka'a wane a'yatawaa yalapünaa süpüla tü weküinjatkat aa'u?

<sup>7</sup>¿Mawalaajuusaijasa wane surulaat? Awalaajünüshi. Je wane apünajüi, ¿a'alijinnüsü süchon tü



nüpünajüinkat nuulia? Aapünüsü süpüla niküinjatüin. Oo'ulaka wane arüleejüi, ¿a'alijinnüsü süchira nürüleejüin nuulia? Aapünüsü süpüla nüsüinjatüin. <sup>8</sup>Shiimüin sünain walaain chi wayuu eekai ni'yataain. We'rüin tüü sainküin mmakat maa'ulu yaa, otta sulu'u tü nüshajakat Moisés. <sup>9</sup>Müsü tü ashajünakat nütüma: “Wanaa sümaa shi'yataain tü jüsachiratkat sünain asaichijaa tü jüpünajüinkat, anasü müleka nnojorule keimataalajain jütüma, süpüla shiküinjatüin süptüshi tü süsaichijüinkat”. Je pütchikat tüü, nnojotsüyaaje süpülain ekirajaa waya sünain aa'inmajaa wamü'ünüin, <sup>10</sup>alu'ujasa sünain awalaajaa chi eekai a'yataain wamüin. Chi apünajakai, talatajatü naa'in süka niküinjatüin süchon tü nüpünajüinkat. <sup>11-12</sup>Akaajaa waya ekirajakana jia sünain nüchiki Cristo, ¿nnojoliishijasa anain waya süpüla walawaa jütüma saa'u wa'yataain, maa aka napüshi na a'yataashiikana nümüin chi Maleiwakai ja'aka? Shiimüin sünain anain waya süpüla walawaa jütüma, süka wayain wane na Aluwataashikana nütüma Cristo. Akaajasa müleka shiyouktüle wayuu nüchiki chi O'tte'erüikai saaliijee wachuntüin walawaa, nnojoleena waya achuntüin awalaajünaa jümüin, mayaashiije müliain waya sünain che'ojain kasa wamüin. <sup>13</sup>Soto jaa'in sünain nawalaajünün na judío a'yataashiikana sulu'u tü a'waajüleekat chi Maleiwakai. Wanaa sümaa no'utüin saa'in tü mürüt aapününjatkat nümüin chi Maleiwakai, aapünüsü namüin süptüshi tü asalaakat süpüla neküinjatüin shia. <sup>14</sup>Akaajaa

wayakana aküjülüikana nüchiki chi O'tte'erüikai, nuluwataain chi Maleiwakai sünain wawalaajününjanain saa'u tü wa'yataaainkat.

<sup>15</sup>Otta tayakai, nnojoiishi achuntüin paala jümüin awalaajünaa. Je tü tamüitpakat jümüin, nnojotsü süpülajatüin joolu'u juwalaajüin taya. A'waataweechi taya sulu'u ta'yataain maja'uule nu'upala chi Maleiwakai, mayaainje oukteechin taya sulu'u müliaa. <sup>16</sup>Nnojoiishi taya a'waataain sulu'u taküjain nüchiki chi O'tte'erüikai sümüin wayuu, süka ajütüüshin ne'e taya nütüma chi Maleiwakai sünain aküjaa. Aisha'ajaa, ¿jamataaleerüje takuaippa müleka nnojore taa'inrüin tü nüjütakat apüla taya? <sup>17-18</sup>Aneekuushi taya nütüma chi Maleiwakai süpüla taküjain nüchiki chi O'tte'erüikai sümüin wayuu, taa'inrakalaka tü nüjütakat apüla taya. Otta tü takuaipakat sünain aküjaa nüchiki sümüin wayuu, nnojoiishi taya achuntüin walaawaa namüin. Je sünainjee tia, alana'aleesia ma'i taa'in sünain talataa.

<sup>19</sup>Tayouktüin awalaajünaa jütüma suuliajatü jia aluwataain taa'u. Mayaainje laülaain taya tamüiwa, müshi aka taya saa'in süchepchia wayuu süpüshua süpüla takaaliijain naya sünain nanoujain nünain Cristo. <sup>20</sup>Wanaa sümaa na'akain taya na judíokana o'unakana süchirua tü nüshajakat Moisés, süpüla takaaliijününjanain naya sünain anoujaa nünain Cristo, taa'inrüin wanaa namaa tü nüshajakat achiki Moisés, ja'itaichi taya nnojolin o'unüin süchirua tü nüshajakat

Moisés maa aka nayakana. <sup>21</sup>Müsia aka takuaippa süna'in na'akain taya na gentilekana süna'in takaaliijeein naya süna'in nanoujain nünain Cristo. Wanaa sümaa eein taya na'aka, nnojishi taya müin aka nakuaippa na judfokana. Mayaainje na'akain taya na gentilekana, nnojotsü taa'inrüin tü nüchiajaakat oulia chi Maleiwakai saa'u to'unüin waneepia süchiirua tü nümakat Cristo. <sup>22-23</sup>Jülüjüsü taa'in waneepia tü taa'inrakat, süka tacheküin takaaliijeein wayuu süpüshua süna'in nanoujain nünain Cristo. Müleka nümaale taya wane wayuu eekai isayüli'inya achiki nünoujain nünain Cristo, eesü taa'in suulia taa'inrüin wane kasa niyoutajatkat anainjee tü taküjüinjatkat nümiin. Teisalajüin takuaippa shii'iree naapein nüchiki chi O'tte'erüikai taküjakat nümiin sümaa nünoujain nünain. Talatashaateerü taa'in müleka nünoujale.

<sup>24-25</sup>Soto jaa'in nukuaippa wane wayuu ayujiraa'i. Süpülapünaa tü ka'i niyoujiraainjatkat o'u, eki'rajaashi waneepia süpüla kalainjachin nia. Je süna'in tü ayujirawaakat, awataashi nia süka süpüshua nütsün shii'iree nükanajein wane kasa. Otta tü nükanajüinjatkat süna'in awatawaa, aja'tteerü maalü. Akaajasa tü wakanajeetkat waya anoujashiikana, matüjainsat aja'ttaa. Je sükajee tia, ji'yataa jümaala nümiin chi Maleiwakai süka süpüshua jaa'in süpüla juwalaajüneenain so'uweena wane ka'i nütüma. <sup>26</sup>Je sükajee tia, süna'in taküjain nüchiki Cristo, eesü taa'in waneepia süna'in tü taa'inrakat süpüshua, maa aka chi eekai yalalayain süna'in ayujirawaa,

maa aka chi eekai yalalayain süna'in ashe'ejirawaa. <sup>27</sup>Eesü taa'in waneepia suulia taa'inrüin tü süchekalakat taa'in tamüiwa, shia taa'inrüinjatka tü nüchekakat chi Maleiwakai tapüleerua süna'in aküjaa nüchiki chi O'tte'erüikai, suulia ne'e mawalaajuun taya nütüma so'uweena wane ka'i.

#### Achiajawaa süna'injee nachiki na judiokana

**10** <sup>1</sup>Tawalayuwaa, süpüla jijaawatüin saa'u tü taküjaitpakat jümüin, anakaja sotüle jaa'in nüchiki chi Maleiwakai wanaa sümaa naa'inmajüin paala na watuushinuukana judiokana. Nujüttirüin naya chajee sulu'ujee Egipto, süka anamiain ma' nia namüin. Nii'yatüin namüin süka wane siruma eepünaainjanale no'unüin. Naa'inmajüin naya süna'in nu'unirüin pasanainpünaa süna'in tü palaa kanülüakat Palaa Ishosü. Nnojliishii emeronojoo'in shiroku tü palaakat, süka josoin shia napüleerua nütüma. <sup>2</sup>Je süna'in no'unüin süchiirua tü sirumakat je süna'in nalatüin pasanainpünaa süna'in tü palaakat, paa'inwajiraashii naya nümaa Moisés chi nekiipü'ikai. <sup>3</sup>Chi Maleiwakai, eepü'üshi namaa süna'in naapüin namüin tü ektüülü nekapü'ukat. <sup>4</sup>Je Cristo, eepü'üshi namaa süna'in aa'inraa tü kasa anasükat namüin, makat aka apülaje'eraa wüin eere alin münyaasü. <sup>5</sup>Otta müshi'iya na watuushinuukana, ja'itaina aa'inmajünapü'üin naya nütüma chi Maleiwakai eepünaale waraittün naya cha'aya sainküin isashiikat, eesüya ne'e waneepia na'akajee watta saalii eekai nnojliin

naa'inrüin tü talatakat atüma naa'in chi Maleiwakai. O'utinna aa'inchi naya nütüma saaliijee tü kasa mojusü naa'inrakat.

<sup>6</sup>Sünainjee watüjaain saa'u tü alatakat namüin na watuushinuukana paala sümaiwa, achiajaanüshii waya maa'ulu yaa suulia kee'ireejüin waa'in kaainjalaa maa aka naa'inrüin nayakana. <sup>7</sup>Anakaja nnojoliire jüüjüüin waya sümüin tü namaleiwaseyaasükalüürua na manoujainsaliikana, maa aka tü naa'inrapü'üikat na watuushinuukana. Müsü tü ashajuushikat nachiki: "Tü wayuu judíokolüürua, na'waajüin tü namaleiwaseyaasükalüürua na manoujainsaliikana sümaa emi'ijaa, ekawaa, asawaa, oo'ulaka oyonnajaa". <sup>8</sup>Je anakaja nnojoliire wa'luwajiraain wakuaiippa sümaa wayuu jierü otta wane jierü nümaa wane toolo, maa aka tü naa'inrakat na watuushinuukana. Saaliijee tia, ouktüshii na'akajee maa aka 23.000 wayuu so'ule'eya wane ka'i. <sup>9</sup>Je anakaja nnojorule woo'ulaküin naa'in chi Maleiwakai, maa aka tü naa'inrakat na watuushinuukana süpüla ouktüinjanain naya sütüma wüi saaliijee tia. <sup>10</sup>Je anakaja nnojoliire keke'eraliin waya nüümüin chi Maleiwakai süpüleerua tü nüchekakat, maa aka tü naa'inrakat na watuushinuukana sümaa no'utünüin aa'in nütüma wane aapiee ajütünakai süpüla süsalainjanain naya. <sup>11</sup>Ashajünüsü nachiki na watuushinuukana wapüla waya katakana o'u maa'ulu yaa saa'ujee süli'ülüin nükalía chi Senyotkai süpüla niitaajeechin nüchikua. Tü alatakat

namüin, ashajüna achikit süpüla süchiajaainjanain waya suulia waa'inrajüin tü kasa mojusü naa'inrapü'üikat.

<sup>12</sup>Nnojo ju'waataain sulu'u jukuaiippa sünain nnojoleenain jaa'inrüin kasa mojusü jaajüin. Jalia jia, kaainjalashii taa jia maa aka na judíokana paala sümaiwa. <sup>13</sup>Oo'ulaküna aa'inchi waya wapüshua waneepia süpüla wojutuüin sa'aka kasa mojusü. Otta wanaa sümaa juu'ulakünüin aa'in, pansaasü nünuiki chi Maleiwakai jümüin süpüla nükaaliijeenain jia. Juunteerü jüchekerüin jaa'in su'unnaa tia, süka nii'iyateerüin jümüin sünain jamüinjatüin jujuittia sa'akajee.

**Achiajawaa suulia jüüjüwaa sümüin tü maleiwayaasükalüürua**

<sup>14</sup>Jia tawalayuu aikana tapüla, saa'u kasalajanain namüin naainjala na watuushinuukana nütüma chi Maleiwakai, juu'ulaa suulia jüüjüüin sümüin tü namaleiwaseyaasükalüürua na manoujainsaliikana. <sup>15</sup>Kekiishii jia süpüla jiyaawatüinjatüin saa'u sünain shiimüin tü pütchi tashajeetkat joolu'u jümüin. <sup>16</sup>Anakaja jülüjjale joolu'u jaa'in tü ekawaa oso'ijitkat waa'in sünain ouktüin Cristo. Wanaa sümaa weküin, wasüin, wanaawajiraasü waa'in nümaa chi Wasenyotsekai. Waapiin analu'ut saa'u tü asüüshikat, süka wanoujain wapüshua sünain amülain nüsha saa'u waainjala. Je tü pankat, ashaletüntisü süpüla shikaanüin watüma, süka wanoujain wapüshua sünain naapajiraain nikii süpüla ouktaa waa'ujee. <sup>17</sup>Ja'itaina wainmain waya, wanaawajiraasü waa'in wapüshua wanaa sümaa weküin tü waneesüikat pan. <sup>18</sup>Maa

aka nakuaiippa na judfokana sünain naapüin nümüin chi Maleiwakai namü'üntüin ouktakat saa'u naainjala, wanaawajiraasü naa'in nümaa chi Maleiwakai wanaa sümaa neküin tü asalaakat.

<sup>19</sup>Soo'opünaa tü shi'irukukat mürüt aapünakat sütüma tü manoujainsatkalüürua sümüin tü sümaleiwaseyaasükalüürua, anuu tü tamüinjatkat jümüin: Tü namaleiwaseyaasükat, je tü shi'irukukat mürüt aapünakat sümüin, watüjaa aa'ut sünain nnojolüin kojütüin watüma waya anoujashiikana. <sup>20</sup>Soto jaa'in: chi asülajünakai amüin, nnojoiishi niain chi Maleiwakai, shia kamüinka tü yolujaakalüürua. Mojuka'aka tamüin wanaawajiraainjatüin jaa'in sümaa tü yolujaakalüürua. <sup>21</sup>Müleka jiküle tü aapuushikat sümüin tü yolujaakalüürua, je jüsüle tü asünakat wanaa sümaa na'waajüin tü namaleiwaseyaasükalüürua, çamataaleerü süpüla wanaawajiraain jaa'in nümaa Cristo wanaa sümaa jutkatüin jia sünain ekaa tü pankat je asaa tü asüüshikat oso'ijitkat waa'in sünain tü naa'inrakat waa'ujee? <sup>22</sup>Je joolu'u, saa'u tü taküjaitpakat jümüin, jütüjaaitpa aa'ut tü kasa anasükat süpüla jaa'inrüinjatüin. Ja'itaina laülaayuuin jia jümüiwa süpüla ekaa tü aapajuushikat sümüin tü maleiwayaasükalüürua, müleka masütaajule jia sünain jaa'inrüin tü nnojotkat nücheküin chi Maleiwakai jüpüleerua, jüchchera jaa'in nüpüla.

**Soo'opünaa laülaain nümüiwa  
wane anoujashi**

<sup>23</sup>Müshii jia: “Laülaa waya wamüiwa süpüla waa'inrüin kasa eekai een ne'e”. Anuu

tanüiki shi'ipajee tü jümakat: Müleka nnojorule kasain saamüin tü jaa'inrakat namüin na juwalayuukana, anakaja müleka nnojorule jaa'inrüin tia. <sup>24</sup>Tü kasa anakat süpüla jaa'inrüin, shiainjatü tü jalouikat sümüin wayuu wainma, nnojotsü shiainjatüin ne'e tü akaaliijiakat jia jümüiwa.

<sup>25</sup>Müleka jiyalajüinjanale asalaa chaa metkaaralu'u, nnojo jüsakirüin müleka shiale süpüshi tü shi'iruku mürüt aapuushikat sümüin tü maleiwayaasükalüürua. <sup>26</sup>Soto jaa'in tü pütchi ashajuushikat: “Chi Maleiwakai, kakumalakai tü mmakat, nia kokoroloko tü kasakat süpüshua yaakat saa'u”.

<sup>27</sup>Je müleka jeenajinnüle sünain wane ekawaa nipialu'umüin wane wayuu manoujainsai, anakaja müleka jiküle tü asalaa naapakat jümüin sümaa nnojolüin jüsakirüin müleka aapuushire sümüin tü maleiwayaasükalüürua. <sup>28-29</sup>Akaajasa müleka nümüle jümüin wane juwala matsüinkai aa'in sünain anoujaa: “Shiasa süpüshi tü shi'irukukat mürüt aapuushikat sümüin tü maleiwayaasükat”, nnojoleerü jiküin niyaalu'u chi juwalakai süpüla jükaaliijainjachin nia sünain achecheraa tü nünoulakat.

Ja'itaina laülaain jia jümüiwa süpüla ekaa asalaa eekai een ne'e, anakaja jaa'inrüle waneepia tü akaaliijüinjatkat wane juwala eekai matsüin naa'in sünain anoujaa. <sup>30</sup>Ja'itaina jia aapüin analu'ut nümüin chi Maleiwakai saa'u tü jiküinjatkat, müleka mojule tü jaa'inrakat no'ulu'u chi juwalakai, anakaja nnojorule jiküin shia. <sup>31</sup>Wanaa sümaa jikaain, wanaa sümaa jüsaain,

wanaa sümaa jaa'inrüin eekai een, anakaja müleka jaa'inrüile shia süpüla kojutüinjachin waneepia chi Maleiwakai sütüma wayuu sünaïnjee tü kasa anasü jaa'inrakat. <sup>32</sup>Anakaja müleka jiisalajüle jukuaippa su'upala wayuu süpüshua suulia jaa'inrüin tü kaainjaleetkat atüma naya, maa aka no'upala na judfökana, no'upala na gentilekana, oo'ulaka no'upala na anoujashiikana napüshua. <sup>33</sup>Anakaja müle jia aka taa'in sünaïn takaaliijeein wayuu süpüshua. Tü taa'inrakat, nnojotsü tapülainjatüin tamüwa, süpüla jatü su'tte'ennüinjatüin wayuu wainma.

**Sukuaippa a'waajaa sulu'u tü outkajaaleekat**

**11** <sup>1</sup>Anakaja müleka jüshatüle takuaippa maa aka tashatüin nukuaippa Cristo. <sup>2</sup>Talatüsü ma'i taa'in süka nnojolüin motüin jaa'in tü kasa anasü taa'inrapü'ükat ja'aka, je süka ayatüin jia sünaïn jünoujain tü shiimüinkat, tü nüchikikat chi O'tte'ertüikai taküjapü'ükat jümüin.

<sup>3</sup>Ayatshia taya joolu'u ekirajüin jia sünaïn jamüinjatüin ju'waajia chi Maleiwakai sulu'u tü outkajaaleekat. Chi laülaakai saa'u wane jierü, nia chi su'wayuusekai. Je chi laülaakai naa'u chi su'wayuusekai, nia Cristo. Oo'ulaka chi laülaakai naa'u Cristo, nia Maleiwa. <sup>4</sup>Aashin jütüjaain saa'u nakuaippa na wawalayuukana sulu'u tü outkajaaleekat sainküin mmakat süpüshua: Chi eekai tooloin, nnojotsü anain müleka kakuomale nia wanaa sümaa nüchuntüin nümüin chi Maleiwakai su'upala wayuu je wanaa sümaa naapirüin wayuu süka nünüiki chi Maleiwakai. Mojutuyaasai Cristo nütüma müleka kakuomale nia

sünaïn achuntaa, süka shii'iyatüin sümüin wayuu sünaïn nnojolin laülaain chi Senyotkai naa'u. <sup>5-6</sup>Akaajaa wane jierü wanaa sümaa een shia sulu'u tü outkajaaleekat, anakaja müleka kekiaalajale shia wanaa sümaa süchuntüin nümüin chi Maleiwakai su'upala wayuu je wanaa sümaa saapirüin wayuu nütüma chi Maleiwakai. Mojutuyaasai chi su'wayuusekai sütüma müleka nnojorule kekiaalajain. Watüjaa aa'ut wane jierü, maa aka mochorole shikii, japüijeerü shia süka tia. Akaajaa wane jierü, müleka nnojorule kekiaalajain sünaïn süchuntüin nümüin chi Maleiwakai, shii'iyatüin namüin na suwalayuukana sulu'u tü outkajaaleekat sünaïn shiyouktüin süpüleerua laülaain chi su'wayuusekai saa'u. Je sükajee tia, anakaja kekiaalajale shia. <sup>7</sup>Wane wayuu toolo, laülaa nia saa'u nu'wayuuse maa aka Cristo laülaain naa'u chi wayuukai. Wanaa sümaa nüchuntüin nümüin chi Maleiwakai sulu'u tü outkajaaleekat, kojutshi chi Maleiwakai nütüma müleka nnojore kakuomain nia. Otta wane jierü, wanaa sümaa süchuntüin su'upala wayuu, anasü müleka kekiaalajale. Saa'inrüin tia süpüla shii'iyatüinjatüin nujut chi su'wayuusekai. <sup>8</sup>Soto jaa'in nüchiki chi Maleiwakai sünaïn nukumajüin wayuu sümaiwa paala: Chi toolokai, nnojishi akumajuushin nia sünaïnjee tü jietkat, alu'ujasa tü jietkat nünainjeejatü chi toolokai. <sup>9</sup>Je chi toolokai, nnojishi e'itaanüin süpüla tü jietkat, alu'ujasa tü jietkat, e'itaaushi nüpüla chi toolokai. <sup>10</sup>Müleka kekiaalajale tü jietkat wanaa sümaa süchuntüin

nümüin chi Maleiwakai sulu'u tü outkajaaleekat, natüjaweerü aa'u na aapieekana chakana iipünaa süna'in jüüjüün shia nümüin chi su'wayuusekai wanaa sümaa süchuntüin.

<sup>11</sup> Anakaja müleka sotüle waa'in waneepia wayakana anoujashiikana: Saa'u wanaawajiraain waa'in wapüshua nümaa chi Wasenyotsekai Jesucristo, che'ojaasü namüin na jiyuukana akaaliijünaa natüma na toolyuukana, oo'ulaka na toolyuukana, che'ojaasü namüin akaaliijünaa natüma na jiyuukana wanaa sümaa wa'yataain nümüin chi Maleiwakai. <sup>12</sup> Aashin akumajuushin tü jietkat nünainjee chi toolokai, akaajaa chi toolokai, süna'in jemeishin nia süna'injee tü jietkat. Shiimüin niain chi Maleiwakai kakumajalakai kasa süpüshua.

<sup>13</sup> ¿Jamüsü jünüiki? ¿Anasü saa'in jümüin müleka süchuntüle wane jierü süna'in mekiaalajain su'upala wayuu sulu'u tü outkajaaleekat?

<sup>14</sup> Je wane wayuu toolo, müleka ka'waloulere, mojutsai nia sütüma wayuu, ¿aashi müin? <sup>15</sup> Alu'usa wane jierü miyo'ule su'wala, anasü shipitüin süka tia. <sup>16</sup> Shia ne'e tü tamüinjatkat soo'opünaa tia. Shia wakuappaka'aya tia sulu'u tü outkajaaleekat süpüshua. Nnojo jumata jü'ülüjjaain saa'ujee tia.

**Tü ekawaa oso'irakat waa'in nünain chi Senyotkai**

<sup>17</sup> Tachiajaainjana joolu'u jia saaliijee tü jaa'inrakat wanaa sümaa jutkatüin jia sulu'u tü outkajaaleekat, süka maamüin tü jaa'inrakat.

<sup>18</sup> Taapa achikichii jia süna'in nnojoliin paa'inwajiraain wanaa

sümaa juutkajaain. Nnojotpaja alawaawalain saa'in tamüin süpüshua tü aküjünakat achiki tamüin. <sup>19</sup> Püla aa'inchii jia noulia na juwalayuukana, süka talatüin naa'in chi Maleiwakai jümaa jiakana ne'e jümüiwa jaajüin.

<sup>20</sup> Nnojo motüin jaa'in süna'in aluwataaushin waya anoujashiikana süpüla wakotchajaain süna'in weküinjatüin tü pankat oso'irakat waa'in nünain chi Senyotkai. Jiakana süna'in outkajawaa, nnojoiishi kojutüin jütüma Cristo.

<sup>21</sup> Na antakana palajana, nnojoliishii na'atapajüin na nawalayuukana süpüla ekirawaa wanaa namaa. Eperuwaashii jia sümaa emirain süna'in yalain na juwalayuukana jamüsirüin. <sup>22</sup> Müleka ouktüle ma'i jia jamü, anakaja müleka jikaale je jüsaale chajee jipialu'ujee. Nnojoliishii jia ta'waajüin saa'ujee tü jaa'inrakat, süka mojutüin jütüma na anoujashiikana nünain chi Maleiwakai sulu'u tü outkajaaleekat, je süka japülin jütüma na juwalayu mojuushiikana.

<sup>23</sup> Taso'ireerü joolu'u jaa'in süna'in tü tekirajapü'ükat anain paalainka. Anakaja jülüjale jaa'in shia, süka niain kaküjalain shia tamüin chi Senyotkai. So'u tü ai aapünüinjatkat o'u nikii chi Wasenyotsekai Jesucristo süpüla nu'utinnejachin aa'in, nakotchajaakalaka na nikirajüinkana süpüla neküinjanain nümaa. Naapaakalaka chi Senyotkai wane pan <sup>24</sup> süna'in naapüin analu'tu nümüin Maleiwa. Nüshaletakalaka tü pankat süna'in nümüin namüin: "Maa aka taapüin joolu'u jümüin tü pankat, meechia taya aapajiraain tekii jaa'u. Tü waa'inrakat joolu'u, süpülatatü jaa'inrüin waneepia

süpüla sotüinjachin jaa'in taya", müshi nia namüin. <sup>25</sup>Akaajaa tü naa'inrakat süka tü iitakat kalu'ukot wiino. Süchikijee nekaain, naapaakalaka shia sünaain nümüin namüin: "Asüüshikat tüü, anuu jüsüitpain joolu'u, müsü aka sukuaippa tü tasha amülainjatkat süpüla nikeraajüinjatüin chi Maleiwakai tü pütchi jeket pansaatüjütkaalia nütüma. Tü waa'inrakat joolu'u, süpüla jatü jaa'inrüin waneepia süpüla sotüinjachin jaa'in taya", müshi nia namüin. <sup>26</sup>Wanaa sümaa jika'walin tü pankat, jüsa'walin tü asüüshikat, soteechi jaa'in chi Senyotkai sünaain ouktüin nia jaa'u. Jaa'inreerü tüü waneepia süpülapünaa nüle'ejüin chi Senyotkai nüchikua.

<sup>27</sup>Jülüja jumaala jaa'in jukuaiippa sünaain jükotchajaain süpüla jiküin tü pankat oo'ulaka jüsüin tü asüüshikat süpüla sotüinjachin jaa'in chi Senyotkai. Wanaa sümaa jiküin tü pankat, müleka nnojorule kojutüin jütüma nukuaippa Cristo sünaain ouktaa, kaainjalashii jia nuulia sükajee tia. Je wanaa sümaa jüsüin tü asüüshikat, müleka nnojorule kojutüin jütüma tü nüshakat, kaainjalashii jia nuulia. <sup>28</sup>Sükajee tia, süpülapünaa jiküin tü pankat, jüsüin tü asüüshikat, anakaja jülüjüle jaa'in tü jukuaippakat jütüjaaiwa saa'u müleka kojutule jütüma chi Senyotkai sünaainjee tü jaa'inrüinjatkat. <sup>29</sup>Müleka mojutule jütüma nukuaippa chi Senyotkai wanaa sümaa jiküin oo'ulaka jüsüin, süsaleena jia nütüma. <sup>30</sup>Taapa achikichii jia sünaain wainmain eekai ayuulin ja'aka, eekai matsüin naa'in, je eekai ouktüin, süka

mojutüin natüma chi Senyotkai wanaa sümaa nekaain tü pankat. <sup>31</sup>Akaajasa müleka jülüjüjale waa'in tü waa'inrüinjatkat süpülapünaa weküin, süpülapünaa wasüin, süpüla kojutüinjachin chi Senyotkai watüma, nnojoleena süsalain waya nütüma. <sup>32</sup>Süsalashii waya nütüma chi Senyotkai süka alin waya nüpüla, suulia sümaayajüin waya tü manoujainsatkalüirua.

<sup>33</sup>Tawalayuwaa, jütüjaaitpa aa'u joolu'u: Wanaa sümaa juutkajaain sünaain ekawaa süpüla sotüinjachin jaa'in chi Senyotkai, anakaja ja'atapajiraale. <sup>34</sup>Chi eekai ouktüin ma'i jamü, anakaja niküle nipialu'ujee nüma'ichiki suulia mojutüjaain jütüma chi Senyotkai suulia süsalajüin ne'e jia nütüma.

Kettaaitpa joo tü tashajakat jümüin süchiki jükotchajaain süpüla jiküin tü pankat. Otta tantapa jünainmüin, tokoo'omüinjeerü jümüin tü tekirajeekat anain.

#### Tü watüjakat apüleerua nütüma chi Naa'inkai Maleiwa

**12** <sup>1</sup>Tawalayuwaa, saa'u tü jüsakitkat anain taya soo'opünaa tü jütüjakat apüleerua nütüma chi Naa'inkai Maleiwa, tacheküin süpüleerua jiyaawatüinjatüin saa'u. <sup>2</sup>Soto jaa'in jukuaiippa manoujainwa'aya jia nünain Cristo. Jütüjüüpü'üshii jia sümüin tü jümaleiwaseyaasükalüirua sümaa ju'waajapü'üin shia, mayaainje nnojolüin kasain anain apüla shia. <sup>3</sup>Je joolu'u saa'u jünoujainapain nünain Cristo, ¿jamüshi süpüla jütüjaainjachin naa'u wane ekirajüi sünaain shiimüin nünüiki je alawaale shia? Müleka e'rüire wayümüin

nia süka nüüiki nüüün Jesús, jütüjaajeechi aa'u nia sünnain nnojolin chi Naa'inkai Maleiwa nümaa. Alu'ujasa müleka nii'iyatüle sümüün wayuu sünnain niain Jesús laülaain naa'u, jütüjaajeechi aa'u sünnain shiimüün een chi Naa'inkai Maleiwa nümaa.

<sup>4</sup>Aapünüsü atüjaa wamüün waya anoujashiikana nütüma chi Naa'inkai Maleiwa süpüla wountünjatüün wa'yataain nüüün chi Maleiwakai. Mayaasüje katata'awain tü atüjaa aapünakat wamüün, waneeshia chi Naa'inkai Maleiwa sünnain eitajaa wamüün tü atüjaakat. <sup>5</sup>Je mayaasüje nnojolüün wanaawain tü wa'yataakat anain nüüün chi Maleiwakai, waneeshia chi Senyotkai aluwataakai waya. <sup>6</sup>Je mayaasüje nnojolüün wanaawain tü naa'inrakat chi Maleiwakai waka, waneeshia chi Maleiwakai aa'inrakai tü anasükat waka wayakana wapüshua.

<sup>7</sup>Aapünüsü atüjaa wamüün wane'ewaie wakua nütüma chi Naa'inkai Maleiwa süpüla wakaaliijirain wapüshua sünnain tü wanoulakat.

<sup>8</sup>Nüüün wane, aapünüsü nütüma chi Naa'inkai Maleiwa atüjaa süpüleerua aapiraa wayuu süpüla aa'inraa tü anasükat.

Nüüün wane'eya, aapünüsü atüjaa süpüleerua niyaawatüün saa'u tü nüchekakat chi Maleiwakai wapüleerua.

<sup>9</sup>Nüüün wane'eya, aapünüsü atüjaa süpüleerua yalayalaa aa'in sünnain anoujaa.

Nüüün wane'eya, aapünüsü atüjaa süpüleerua ayaleraa eekai ayuulin.

<sup>10</sup>Nüüün wane'eya, aapünüsü atüjaa nütüma chi Naa'inkai süpüleerua naa'inrüün wane kasa anasü nütüjakat apüleerua chi Maleiwakai nüümüwa.

Nüüün wane'eya, aapünüsü atüjaa süpüleerua aapiraa wayuu süka nüümüiki chi Maleiwakai.

Nüüün wane'eya, aapünüsü atüjaa süpüleerua ayaawataa saa'u tü nümakat wane aküjai, müleka shiimüünre, alawaale shia.

Nüüün wane'eya, aapünüsü atüjaa süpüleerua a'waajaa chi Maleiwakai süka tü pütchi me'raajuukat sütüma wayuu.

Nüüün wane'eya, aapünüsü atüjaa süpüleerua niyaawatüün saa'u tia pütchikat.

<sup>11</sup>Chi atüjakai atüma waya anoujashiikana wapüshua, nia chi Naa'inkai Maleiwa nüümüwa. Naapüün wamüün süka naa'in nüümüwa wane'ewaie wakua tü atüjaakat süpüla wa'yataain nüüün chi Maleiwakai.

#### **Akaaliijirawaa natüma na anoujashiikana**

<sup>12</sup>Mayaasüje nnojolüün wanaawain tü watüjakat apüleerua nütüma chi Naa'inkai Maleiwa, je mayaasüje nnojolüün wanaawain tü wa'yataakat anain nüüün Cristo, wayajira'alee ne'e wapüshua, maa aka saa'in sukuaippa waneesia wayuu. Mayaainje een najapü, nüche'e, nuu'ui, no'u wane wayuu nünnain, nnojoiishi sükatajiraain. Waneeshia ne'e nia. <sup>13</sup>Je wekerolapa sünnain



anoujaa, o'ttishii waya nütüma chi Naa'inkai Maleiwa sünain wanaawajiraain waa'in nümaa Cristo. Je joolu'u süka eeichipain chi Naa'inkai Maleiwa sulu'u waa'in, wayajira'alee ne'e wapüshua, ja'itaina waya judóin je gentilein, ja'itaina piunain je laülaain wamüüwa.

<sup>14</sup>Anakaja sotüle jaa'in wane wayuu sünain wainmain sü'ülia sünain: eesü najapü, nüche'e, nuu'ui, no'u, otta süpüshua eekat nünain.

<sup>15</sup>Ja'itastü müin tü nuu'uikat: “Süka nnojolüin najapüin taya, nnojotsü che'ojaain taya nümüin chi wayuukai”, nnojotsü akatalaain suulia nukuaippa. Ayateeria nünain waneepia. <sup>16</sup>Ja'itastü müin tü nüche'ekat: “Süka nnojolüin no'uin taya, nnojotsü che'ojaain taya nümüin chi wayuukai”, nnojotsü akatalaain suulia nukuaippa. Ayateeria nünain waneepia.

<sup>17</sup>Müleka eere no'u sümüüwa, iseerü nüchiki aapaa sünüiki wayuu. Müleka eere nüche'e sümüüwa, iseerü nüchiki aataa sheejuu niküin. <sup>18</sup>Soto jaa'in chi Maleiwakai sünain nükumajüin waya sünain nünouktüin wakuaippa sulu'u tü nüchekakat wapüleerua. <sup>19</sup>Müleka eere wekii sümüüwa ne'e nütüma, isasü wachiki katüinjatüin wo'u.

<sup>20</sup>Mayaasüje waneesüin wakuaippa, nükumajüin waya sünain wainmain wa'ülia wanain, je nnojotsü ein wa'ülia wanain nnojotkat che'ojaain wamüin.

<sup>21</sup>“Nnojotsü kasain paamüin tamüin”, nnojoleerü müin tü wo'ukot sümüin tü wajapükat, je nnojoleerü müin tü wekiikat sümüin tü woo'uikat. <sup>22</sup>Akaajaa tü wa'ülia eekai maamüin wamüin saa'in

wamüin, che'ojaashaatasü. <sup>23</sup>Je tü wa'ülia eekai nnojolüin kasajatüin wamüin saa'in wamüin, ayatsia waa'inmajüin. Oo'ulaka tü nnojotkat shi'rüinjatüin wayuu wanain, wa'atüin washe'in saa'u. <sup>24</sup>Je tü eekai shi'rüinjatüin wayuu wanain, ayatsia ma'atujuin kuluulu saa'u. Aka'aya wayakana anoujashiikana, anouktünüshii waya nütüma chi Maleiwakai sulu'u tü nüchekakat wapüleerua. Chi mojutsai sütüma wayuu, kojutshi nia nütüma chi Maleiwakai. <sup>25</sup>Nücheküin chi Maleiwakai süpüleerua nnojolüinjanain wakatajiraain. Akaaliijiraainjana ne'e waya saa'u ajjiraain waya wapüla wapüshua. <sup>26</sup>Müleka eere eekai müliain wa'aka, müliajiraajeena waya wapüshua nümaa. Akaajaa müleka eere eekai kojutüin sütüma wayuu wa'aka, talateerü waa'in wapüshua nümaa.

<sup>27</sup>Otta jiakana anoujashiikana chakana Corinto, shiimüin sünain jiain nüpüshin Cristo wane'ewaire jukua. Müleka wanaawajiraale jaa'in, jiajiraajeena jüpüshua maa aka sukuaippa wane wayuu waneesia. <sup>28</sup>Wayaa anoujashiikana wapüshua, e'itaanüshii waya sulu'u tü outkajaaleekat nütüma chi Maleiwakai süpüla wa'yataainjanain nümüin Cristo. Aapünüsü atüjaa wamüin wane'ewaire wakua nütüma chi Naa'inkai Maleiwa süpüla wakaaliijiraainjanain wapüshua sünain tü wanoulakat. Nüneeküin chi Maleiwakai na Aluwataaushikana palajana. Je süchikijee tia, nüneeküin waneerua süpüla saapiee wayuu nünüiki. Je süchikijee tia, nüneeküin waneerua süpüla ekirajaa na nawalayuukana. Otta nümüin wane'eya, aapünüsü

atüjaa nütüma chi Naa'inkai Maleiwa süpüla naa'inrüin wane kasa anasü nütüjakat apüleerua chi Maleiwakai nümüiwa. Eeshi aapünakai amüin atüjaa eiyajaa eekai ayuulin. Eeshi aapünakai amüin atüjaa akaalinjaa wayuu. Eeshi atüjakai aluwatawaa sulu'u tü outkajaaleekat. Eeshi atüjakai a'waajaa chi Maleiwakai süka tü pütchi me'raajuukat sütüma wayuu.

<sup>29</sup> ¿Nüneeküin chi Maleiwakai wayuu süpüshua süpüla nayain na Aluwataaushikana? Nnojo. ¿Nüneeküin süpüshua süpüla saapiein wayuu nünüiki? Nnojo. ¿Nüneeküin süpüshua süpüla ekirajaa? Nnojo. ¿Atüjashii napüshua nütüma chi Naa'inkai Maleiwa süpüleerua naa'inrüinjatüin tü nütüjakat apüleerua chi Maleiwakai nümüiwa? Nnojo. <sup>30</sup> Nnojotsü atüjain wayuu süpüshua eiyajaa wayuu. Nnojotsü atüjain wayuu süpüshua a'waajaa chi Maleiwakai süka tü pütchi me'raajuukat sütüma wayuu. Nnojotsü atüjain wayuu süpüshua ayaawataa tia pütchikat.

<sup>31</sup> Jia chakana Corinto, anakaja shiale kee'ireein jaa'in atüjaa süpüla akaaliijaa na juwalayuukana sünain tü nanoulakat. Je tü taküjeekat achiki joolu'u jümüin, alana'aleesia ma'i sünain anasüin süpüla jaa'inrüinjatüin shia waneepia saa'u jükaaliijuushin nütüma chi Naa'inkai Maleiwa.

#### Alii apüla wayuu

**13** <sup>1</sup> Müleka maalinre wayuu tapüla, nnojoleerü kasain saapiin tü tamakat sümüin. Ja'itairü keme'eriain tanüiki, maa aka saa'in nünüiki wane wayuu eekai nütüjain ma'i je nünüiki wane aapiee

eejeejachi Maleiwa, meerü aka ne'e saa'in shi'ira türoompa sünain maamüinsat wamüin.

<sup>2</sup> Müleka maalinre wayuu tapüla, nnojoleerü tountüin takaaliijain naya sünain tü nanoulakat. Ja'itairü tayaawatüin saa'u tü kasa mayaawatujukat aa'u sütüma wayuu, mayaasüje aapünüin tamüin atüjaa süpüleerua e'itawaa taa'in sünain anoujaa süpüla taa'inrüin tü kasa isakat süchiki wayuu, je mayaasüje te'itaanüin nütüma Maleiwa süpüla saapiee wayuu nünüiki, müleka maalinre wayuu tapüla, nnojoleerü kasain saapiin tü taa'inrakat.

<sup>3</sup> Ja'itairü taapajiraain tekii süpüla ouktaa sünainjee anoujaa, ja'itairü tasülajüin tü tokorolokolüirua süpüshua sümüin eekai che'ojaain kasa sümüin, müleka maalinre wayuu tapüla, nnojotsü kasain saapiin tamüin, mayaasüje kojuteechin taya sütüma wayuu sünainjee.

<sup>4</sup> Müleka shiimüinre sünain alin tapüla wayuu, nnojoleerü akulajaain taa'in sünain kamanewaa namüin, je nnojoleerü achunjain taa'in sümaa ta'waataain sulu'u takuaippa no'upala sünain pülayaain taa'in noulia. <sup>5</sup> Nnojoleechi ji'iyein taya noulia, je nnojoleechi e'rülin wayumüin namüin. Nnojoleechi taya aashichijaain maalü namüin sümaa nnojolüin motüin taa'in süpüshua tü kasa mojusü naa'inrakat paala tamüin.

<sup>6</sup> Müleka shiimüinre sünain alin tapüla wayuu, talateerü taa'in taapapa nachiki sünain ayatüin naya sünain tü shiimüinkat, akaajasa mojule nachiki, mojeerü taa'in.

<sup>7</sup> Chi wayuu eekai alin tapüla, ayateechia taa'inmajüin

je tanoujeerü waneepia tü nüküjakat tamüin. Ja'itashi kaainjalain nia, nnojoleechi taleejüin, süka kee'ireein ma'i taa'in naa'inrüinjatüin tü anasükat nüchikua.

<sup>8</sup>Tü aliikat apüla wayuu, ayateerü che'ojaain waneepia. Akaajasa tü wayuu eekai aapieein nüniiki Maleiwa, je eekai su'waajüin chi Maleiwakai süka tü pütchi me'raajuukat sütüma wayuu, oo'ulaka eekai niyaawatüin saa'u tü nüchekakat chi Maleiwakai wapüleerua, nnojoleena che'ojaain so'uweena wane ka'i.

<sup>9</sup>Je maa'ulu yaa, che'ojaayülia wamüin ekirajünaa süna'in tü nüchekakat chi Maleiwakai wapüleerua, je che'ojaayülia wamüin aapinnaa süka nüniiki.

<sup>10</sup>Otta so'uweena wane ka'i, nnojoleerü che'ojaain shia wamüin, süka eejeenain waya nümaa.

<sup>11</sup>Maa aka jintüliiwa'aya taya, jo'uweesü taa'in süka tanüiki je süka tü jülüjapü'ukat taa'in. Mayaasü miyo'upa taya, alaüle'etshi taya taa'in. <sup>12</sup>Aka'aya maa'ulu yaa, saa'u matüjaain waya saa'u süpüshua nüchiki chi Maleiwakai, müshii aka waya saa'in tepichi. Otta so'uweena tü ka'i washa'walaajatkat o'u nümülatu'u chi Maleiwakai, we'raajeechi nia maa aka ni'raajüin wayakanaya.

<sup>13</sup>Anakaja joolu'u müleka ayatüle we'itaain waa'in süna'in wanoujain nünain chi Maleiwakai, süna'in kee'ireein ma'i waa'in tü kasa anasü naa'inreetkat wamüin, je süna'in alin wapüla tü wayuukolüirua süpüshua waneepia. Otta tü alana'aleekat sulu'u anain süpüla waa'inrüin, shia alii apüla wayuu.

## Tü pütchi me'raajuukat sütüma wayuu

*je tü aapiraakat süka nüniiki  
chi Maleiwakai*

**14** <sup>1</sup>Tamüshii paala jia jüchikua: Tü alana'aleekat sulu'u anain süpüla jaa'inrüin, shia alii apüla wayuu. Je anakaja müleka shiale kee'ireein jaa'in aapünaa amüin atüjaa nütüma chi Naa'inkai Maleiwa. Je tü atüjaa wanaakat süpüla kee'ireein jaa'in, shieesü tü atüjaakat süpüleerua aapiraa wayuu süka nüniiki chi Maleiwakai. <sup>2</sup>Süka jamüin, chi a'waajakai chi Maleiwakai süka tü pütchi me'raajuukat sütüma wayuu, nnojoiishi aashajaashin namüin na nuwalayuukana, nia naashajaaka amüin chi Maleiwakai nümiüwa. Mayaasüje akaaliijuushin nia süna'in a'waajaa nütüma chi Naa'inkai Maleiwa, tü pütchi nu'waajakat aka, nnojotsü nayaawata aa'u na aapakana shia. <sup>3</sup>Chi wayuu aapirakai wayuu nütüma chi Maleiwakai, nükaaliijain na nuwalayuukana süpüla katsüinjatüin naa'in süna'in anoujaa su'unnaa tü müliaa ne'rakat. <sup>4</sup>Akaaliijünüshii nütüma napüshua'ale na sulu'ukana tü outkajaaleekat. Otta chi a'waajakai süka tü pütchi me'raajuukat sütüma wayuu, süpülainjatü ne'e nütsüin nümiüwa süna'in anoujaa. <sup>5</sup>Je sükajee tia, müleka eere wane wayuu cha'aya eekai niyaawatüin saa'u tia pütchikat, anasü müleka nüküjale shia namüin na nuwalayuukana süpüla katsüinjatüin naa'in süna'in anoujaa sütüma. Müleka jütüjaleje jüpüshua süpüleerua a'waajaa chi Maleiwakai süka tü pütchi

me'raajuukat sütüma wayuu, anasü tia tamüin. Otta müleka jütüjaleje jüpüshua süptüleerua aapiraa wayuu süka nünüiki chi Maleiwakai, alana'aleesia ma'i sünain anain, süka sükaaliijeenain waneepia na wayuukanairua sulu'u tü outkajaaleekat.

<sup>6</sup>Tawalayuwaa, müleka tantataarüle joolu'u jünainmüin sünain ta'waajüin chi Maleiwakai süka pütchi me'raajuukat sütüma wayuu, ¿kaseerü saapaka jümüin? Wanaa sümaa chapü'üin taya ja'aka sünain ekirajaa, takaaliijüin jia süpüla jiyaawatüin saa'u tü nüchekakat chi Maleiwakai jüpüleerua, sükajee taapirüin jia nütüma chi Maleiwakai, je sükajee taküjain jümüin tü nii'yatakat paala tamüin. <sup>7</sup>Soto jaa'in sukuaiippa wane maasü. Mayaasüje nnojolüin waneen kasa kato'u shia, wacheküin watüjaweein saa'u tü shii'irajakat achiki. Müleka nnojorule ja'yashin sulu'u tü shii'irainkat, nnojoleerü watüjaain aa'u tü jayeechikat. <sup>8</sup>Akaajaa sukuaiippa wane jontoroyoi. Müleka nnojorule ja'yashin sulu'u shii'irain, nnojoleerü sütüjaain aa'u tü surulaatkalüirua tü aluwataanakat anain naya. <sup>9</sup>Aka'aya jiakana sünain ekirajaa na juwalayuukana sünain tü nanoulakat, müleka nnojorule ja'yashin sulu'u jünüiki, nnojoleerü kasain saapüin tü pütchikat namüin süka nnojolüin ne'raajüin shia. <sup>10</sup>Soto jaa'in sünain naata'awain sünüiki wayuu sainküin mmakat süpüshua suulia wanüiki. Müleka kache'ere waya sünüiki wane wayuu, watüjaajeerü aa'u tü saashajaakat achiki. <sup>11</sup>Otta müleka mache'ere waya nanüiki, meena aka waya

saa'in wayuu naatajatü namüin. Aka'aya mache'ere naya wanüiki, meena aka naya saa'in wayuu naatajatü wamüin. <sup>12</sup>Saa'u kee'ireein jaa'in aapünaa amüin atüjaa nütüma chi Naa'inkai Maleiwa, anakaja müleka shiale jücheküin tü jükaaliijainjatkat na juwalayuukana sünain anojjaa.

<sup>13</sup>Chi a'waajakai süka tü pütchi me'raajuukat sütüma wayuu, anashi müleka nüchuntüle aapünaa amüin atüjaa süpüla niyaawatüin saa'u tü pütchikat süpüla nüküjain shia namüin na nuwalayuukana sulu'u tü outkajaaleekat. <sup>14</sup>Müleka jaashajaale nümaa chi Maleiwakai süka tü pütchi me'raajuukat sütüma wayuu, nnojoleerü jiyaawatüin aa'u mayaasüje jüle'eru'ujeejätüin shia. <sup>15</sup>Je sükajee tia, ¿kasa anaka süpüla jaa'inrüin? Müleka jaashajaale nümaa chi Maleiwakai sünain jii'irajüin nüümüin süka tü pütchi jüle'eru'upünaajatkat, acheküsü jülüjain jaa'in shia süpüla jiyaawatüin saa'u süpüla jüküjain shia namüin na juwalayuukana. <sup>16</sup>Müleka jaapüle analu'ut nüümüin chi Maleiwakai süka tü pütchikat, ¿jameechi chi juwala nnojokai ayaawatüin saa'u jünüiki? Nnojoleechi “Amén, shiimüin tia”, müin nia, süka nnojolüin ni'raajüin shia. <sup>17</sup>Anasü sulu'u jaapüin analu'ut nüümüin chi Maleiwakai süka tia pütchikat. Shia mojuka alu'u nnojoliin jükaaliijain na juwalayuukana süka.

<sup>18</sup>Taapüin analu'ut nüümüin chi Maleiwakai süka ta'waajüin nia wainmatua juulia süka tü pütchi me'raajuukat sütüma wayuu. <sup>19</sup>Otta sulu'u tü outkajaaleekat, ta'waajüin nia waneepia süka

pütchi ja'yakat, süka tacheküin süpüleerua nayaawatüin saa'u na tawalayuukana tü tekirajakat anain. Mayaasüje palitchoin tü pütchi ja'yakat, anasü saa'in tamüin suulia wainma pütchi eekai me'raajuuin sütüma wayuu. <sup>20</sup>Tawalayuwaa, anakaja müle aka jia wane jo'uu sünain jükatannüin suulia kaainjalaa. Otta sünain tü jülüjakat jaa'in sulu'u tü outkajaaleekat, juu'ulaa suulia jo'uween jaa'in. Shia anaka alu'u jülaüle'erüle jaa'in.

<sup>21</sup>Soto jaa'in tü nünüikikat chi Maleiwakai ashajuushikat paala sümaiwa:

“Na wayuu achiajaajeenakana tatüma na tapüshikana, naatajateerü nanüiki.

Ja'itaka'a tuchiaain naya nakajee, nnojoleena oonoin sümaa tanüiki”.

<sup>22</sup>Nii'iyatüin chi Maleiwakai sünain jashichin namüin na watuushikana süka nüchiajaain naya sükajee wayuu naatakant anüiki. Otta maa'ulu yaa, ekirajünüshii waya nünain chi Maleiwakai sükajee aapinnaa süka nünüiki.

<sup>23</sup>¿Jameena müleka jutkatüle jia sulu'u tü outkajaaleekat sünain ju'waajüin chi Maleiwakai jüpüshua süka tü pütchi me'raajuukat sütüma wayuu? Na jeketkana antüin ja'akamüin, eekai anoujashin otta eekai manoujain, “maa'insalii naya”, meena naya süka nnojoliin nayaawatüin saa'u tü jaashajaakat achiki. <sup>24-25</sup>Otta müleka shiale naapajüin jünüiki jüpüshua sünain aapiraa nütüma chi Maleiwakai, nayaawateerü aa'u sünain kaainjaraliin naya je sünain kasalajaneerüin namüin tü naainjalakat sünainjee tü jüküjakat

achiki namüin. Nayaawateechi aa'u chi Maleiwakai sünain nütüjaain saa'u süpüshua tü jülüjapü'ükat naa'in, je sünain shiimüin sünain een nia ja'aka. Je nasapainyo'ukeena naya sünain na'waajüin chi Maleiwakai wanaa jümaa.

**Anakaja lotüle sukuaiippa süpüshua tü aa'innakat**

*sulu'u tü outkajaaleekat.*

<sup>26</sup>Tawalayuwaa, jülüja jumaala jaa'in tü tashajütpakat jümüin süpüla katsüinjatüin naa'in na juwalayuukana sünain tü nanoulakat sütüma süpüshua tü jaa'inrakat wanaa sümaa jutkatüin. Eeshii ja'aka sulu'u tü outkajaaleekat eekai nee'irajüin jayeechi, eekai nekirajüin jia, eekai naküjüin süchiki tü nii'iyatakat chi Maleiwakai, eekai na'waajüin süka tü pütchi me'raajuukat sütüma wayuu, oo'ulaka eekai niyaawatüin saa'u tia pütchikat süpüla nüküjain shia sümüin tü nuwalayuukalüirua. <sup>27</sup>Müleka eere eekai na'wajeein chi Maleiwakai süka tü pütchi me'raajuukat sütüma wayuu, anashii müleka na'waajüle maa aka piama oo'ulaka apünüin shiale, shia ne'e, sünain pachukuatüin naya. Otta eeweeshi wane ja'aka eekai niyaawatüin saa'u tia pütchikat süpüla nüküjain shia sümüin tü nuwalayuukalüirua. <sup>28</sup>Akaajasa müleka nnojore wane eekai niyaawatüin saa'u süpüla nüküjain shia sümüin tü juwalayuukalüirua, anakaja ko'utüle naya sulu'u tü outkajaaleekat sümaa na'waajüin chi Maleiwakai sulu'u naa'in ne'e.

<sup>29</sup>Je na juwalayuu atüjakana süpüla saapiee wayuu nünüiki chi

Maleiwakai, wanaa sümaa jutkatüin jia sulu'u tü outkajaaleekat, anashii müleka nekirajüle maa aka piama oo'ulaka apünüin shiale. Je na wayuu aapakana nanüiki, anashii müleka jülüjale ma'i naa'in shia natüjaaiwa saa'u müleka shiimüinre nünüikin chi Maleiwakai shia. <sup>30-31</sup> Je wanaa sümaa nikirajüin wane juwala, müleka nii'iyatüle chi Maleiwakai wane kasa nümüin wane awalaa ja'aka, anashi müleka nuu'ulaale chi wane nüpüleerua süpüla nekirajüinjanain wane'ewaie nakua. Nücheküin chi Maleiwakai süpüleerua jikirajiraain jüpüshua süpüla katsüinjatüin jaa'in sünain anoujaa. <sup>32</sup> Jiakana atüjakana süpüleerua saapiee wayuu nünüiki chi Maleiwakai, anakaja müleka jülüjale jaa'in tü jikirajakat anain. Süka jamüin, jülüjasü ma'i naa'in na juwalayuukana süchiki tü jikirajakat anain naya süpüla natüjaain saa'u müleka shiimüinre nünüikin chi Maleiwakai shia. <sup>33</sup> Jiakana aapajakana nanüiki, müleka jusakireere soo'opünaa tü ekirajünakat anain jia, anashii jusakirüle sünain nnojolin jü'ülüjaain. Nnojotsü nücheküin chi Maleiwakai süpüleerua wa'ülüjaajiraainjanain, shia nüchekaka lotein wakuaippa sünain jutkataa. Tüü, shia taluwataaka anain na anoujashiikana sulu'upünaa tü outkajaaleekat süpüshua. <sup>34-35</sup> Je wane awalaa jierü, müleka süsakireere soo'opünaa tü ekirajünakat anain, anasü süsakirüle chi su'wayuusekai süchikijee nepialu'ümüin. Shia anaka alu'u müleka sotüle saa'in tü nüshajakat Moisés soo'opünaa jüüjüünjatüin wane jierü nümüin chi su'wayuusekai.

<sup>36</sup> Eeshii ja'aka cha'aya Corinto eekai nayain namüiwa ne'e saa'in namüin sünain atüjawaa saa'u tü nüchekakat chi Maleiwakai. Nnojotsü shiimüin tia. <sup>37</sup> Saa'u atüjain jia jaajüin nütüma chi Naa'inkai Maleiwa süpüla aapiraa wayuu nütüma, jütüjaajerü saa'u tü tashajakat jümüin sünain shiain tü nuluwataakat anain chi Maleiwakai. <sup>38</sup> Müleka jiyouktüle tanüiki, nnojoluja shiimüin sünain atüjain jia nütüma chi Naa'inkai Maleiwa. <sup>39</sup> Tawalayuwaa, tamüshii paala jia jüchikua: Anakaja müleka shiale kee'ireein jaa'in atüjaa süpüla aapiraa wayuu süka nünüiki chi Maleiwakai. Je müleka eere wane ja'aka eekai na'waajein chi Maleiwakai sulu'u tü outkajaaleekat süka tü pütchi me'raajuukat sütüma wayuu, nnojo juu'ule'erüin naya suulia. <sup>40</sup> Anakaja müleka lotüle sukuaippa süpüshua tü jaa'inrakat sulu'u tü outkajaaleekat sümaa nnojoliin jü'ülüjaajiraain, süpüla talatüin naa'in chi Maleiwakai.

Wanaa sümaa nüso'iraain aa'in Cristo

**15** <sup>1-2</sup> Tawalayuwaa, anakaja joolu'u toso'irüle jaa'in sünain nüchiki Cristo, chi O'tte'ertüikai, tü taküjapü'ükat paala jümüin, tü jaapaakat süpüla ju'tte'ennüinjanain sütüma. Jüchereerü jaa'in sünain anoujaa müleka ji'itaale jaa'in sünain anoujaa waneepia tü shiimüinkat taküjapü'ükat jümüin. Akaajasa müleka jiyouktüle shia, nnojoleerü kasain saaptüin jümüin.

<sup>3</sup> Tü ee'iyatünakat tamüin, tekirajüin jia sünain. Alana'alesia ma'i shia sümaa anain, je anasü süpüla aapaanüin sütüma wayuu

süpüshua. Müsü nüchiki Cristo taküjapü'ükat jümüin: Ouktüshi nia saa'u waainjala. <sup>4</sup>Ojoitüntüshi nia sütüma wayuu, je süchikijee so'u apünüin ka'i, süso'iraakalaka naa'in nütüma chi Maleiwakai. Shia tü ashajünakat paala nüchiki Cristo sulu'u tü karaloukta nüchikimaajkatkat Maleiwa.

<sup>5</sup>Je süchikijee nüso'iraain aa'in, nii'iyataakalaka nümüin Pedro, oo'ulaka mapa, namüin na waneerua Aluwataaushikana.

<sup>6</sup>Shiasa süchikijee tia, nii'iyataakalaka namüin maa aka 500 wawalayuu wanaa sümaa jutkatüin naya. Anaayülia wainma no'utku katüin o'u maa'ulu yaa, otta eeshii eekai ouktüinain. <sup>7</sup>Je süchikijee tia, nii'iyataakalaka nümüin Santiago oo'ulaka mapa namüin na Aluwataaushikana napüshua'aya. <sup>8</sup>Je mapa kakalia nachikijee nayakana, ee'iyataashi Cristo tamü'inya, mayaashije nnojolin nümaaajachin taya paala maa aka nakuaippa nayakana.

<sup>9</sup>Otta müsia joolu'u, mayaashije aneekuushin taya nütüma Cristo süpüla tayainjachin wane Aluwataaushikai maa aka nayakana, nnojotsü sükajeejatüin aa'inraa kasa anasü. Saa'in tamüin, nnojotsü wanaain sümaa kojutüin taya sütüma wayuu maa aka nayakana, saa'u te'rapü'üin wayümüin namüin na anoujashiikana nünain chi Maleiwakai sulu'upünaa tü outkajaaleekat sainküin mmakat süpüshua. Müliashii naya tatüma sümaa to'utirüin naa'in. <sup>10</sup>¿Kasa aneekünaka anainjee taya? Aneekünüshi taya nütüma chi Maleiwakai süka anamiain ne'e nia tamüin. Je süka nii'iyatüin na'anasia

tamüin, emetutsü ma'i ta'yataain nümüin nouliale napüshua na Aluwataaushikana. Tountüin ta'yataain nümüin, süka nükaaliijain taya waneepia. <sup>11</sup>Tü nüchikikat chi O'tte'erüikai taküjapü'ükat jümüin, shia'a ne'e tü nüchiki jaapaaitpakat süpüla ju'tte'ennünjanain sütüma. Shia tü naküjakat na waneerua Aluwataaushikana.

#### **Tü oso'irawaakat aa'in süchikijee ouktaa**

<sup>12</sup>Wekirajüin wayuu süpüshua sünain süso'iraain naa'in Cristo süchikijee ouktaa. Je sükajee tia, nnojo jaapaain sünüiki wayuu “matüjüinsat oso'irawaa saa'in wayuu” makat. <sup>13</sup>Müleka matüjüinreje oso'irawaa saa'in wayuu, nnojoishije oso'iraain aa'in Cristo. <sup>14</sup>Je müleka nnojoruleje nuso'iraain aa'in Cristo, nnojotsüja'a kasain saapüinjatüin jümüin tü nüchiki waküjakat jümüin. Akaajaa ne'e sukuaippa tü jünoulakaliya. <sup>15</sup>Müleka matüjüinreje oso'irawaa saa'in wayuu, nnojoishije nüso'ire'erüin aa'in Jesucristo chi Nüchonkai Maleiwa, je alawaaje ne'e tü waküjakat jümüin nüchiki chi Maleiwakai sünain nüso'ire'erüin naa'in chi Nüchonkai. <sup>16</sup>Müleka shiimüinreje sünain matüjüin oso'irawaa saa'in wayuu, nnojoishije oso'iraain aa'in Cristo. <sup>17</sup>Je müleka nnojoruleje nuso'iraain aa'in Cristo, nnojotsüja'a kasain saapüin jümüin tü jünoulakat, je nnojotsüja'a ala'ajaanüin jaainjala juulia, <sup>18</sup>otta na juwalayuu anoujakana nünain Cristo eekai ouktüin, amüloushijja'a naya. <sup>19</sup>Müleka nnojoruleje shiimüin sünain süso'iraainjatüin waa'in süchikijee ouktaa, nnojoluja'a mata

kasain anain apüla wanoujain nünain Cristo.

<sup>20</sup>Je joolu'u tamüshii paala jia süka süpüshua taa'in: Shiimüin ma'i sünain nüso'iraa'in aa'in Cristo süchikijee ouktaa. Je sükajee süso'iraa'in naa'in, watüjaa aa'ut sünain süso'iraa'injateerüin waa'in wayakanaya süchikijee ouktaa. <sup>21-22</sup>Soto jaa'in nüchiki Adán paala sümáiwa. Ouktüshi nia saaliijee naainjala. Maleeirüma'aka ouktüin wayuu süpüshua saa'u saainjala maa aka naa'in. Otta nünainjee Cristo, suuntuin joolu'u wayuu katüin so'u. Oso'iraa'eerü waa'in waya anoujashiikana wapüshua süka wanaawajiraa'in waa'in nümaa. <sup>23</sup>Oso'iraa'sü naa'in Cristo palajana. Je oso'iraa'eerü waa'in wayakanaya süka nüpüshin waya. Je sükajee süso'iraa'in naa'in palajana, watüjaa aa'ut sünain süso'iraa'injateerüin waa'in so'uweena tü ka'i niitaainjateetkat o'u nüchikua.

<sup>24-26</sup>Süchikijee nüle'e'jüin Cristo, aluwataajeechi nia süpüla nükanajüinjanain na nü'ünüükana. Ja'itaina pülashin na sülaülakana yolujaa, akanajuweena napüshua nütüma. Je süchikijee nükanajüin na nü'ünüükana napüshua, oo'ulaa meeria tü ouktaakat nütüma. Je wayakana anoujashiikana, sünainjee wayain nüpüshin Cristo, o'uneena waya nütüma nüma'anamüin chi Washikai Maleiwa chaa ipünaamüin eere nuluwataain. Aja'lajaa meeria tü kasa we'rakat yaa mmolu'u je tü chakat cha'aya ipünaa sirumatu'u so'uweena tia ka'ikat. <sup>27</sup>Ashajünüsü paala süchiki tüü: "Akanajuweerü tü kasakat süpüshua'aya süpüla jüüjüünjatüin shia nüümüin Cristo". Mayaasüje "kasa süpüshua" sümüin

tü pütchikat, nnojotsü aashajaain nüchiki chi Maleiwakai sünain jüüjüünjachin nüümüin Cristo. Saa'u pülashin chi Maleiwakai, nia akanajitka Cristo tü kasakat süpüshua. <sup>28</sup>Je jüüjüüpa kasakat süpüshua nüümüin Cristo chi Nüchonkai Maleiwa, jüüjüüjeechi nia nüümüin chi Nüshikai. Nieechikalaka Maleiwa laülaain saa'u kasakat süpüshua'ale.

<sup>29</sup>Soto jaa'in sukuaiippa tü wayuu manoujainsatkalüürua o'oojakana namüin na eekai ouktüin. Müleka matüjüinreje oso'irawaa saa'in wayuu süchikijee ouktaa, nnojotsüje naa'inrüin shia. <sup>30-31</sup>Je müshia tayakai, mayaa'inje takaaliijüünin nütüma chi Wasenyotsekai Jesucristo süpüla ta'yataainjachin ja'aka, te'rüin müliaa sünainjee. Müleka matüjüinreje oso'irawaa saa'in wayuu, nnojoishije taya achecherüin taa'in su'unnaa tia <sup>32</sup>oo'ulaka su'utpünaa tü ne'ralakat wayümüin tamüin na wayuu jashichikana tamüin yaaya Éfeso.

"Anashii wemi'ijaale ne'e, süka sülü'ülüin wakalia süpüla ouktaa", müshije ne'e taya jümüin. <sup>33</sup>Nnojo jaapaain pütchi eekai müin aka tüü. <sup>34</sup>Anakaja müleka japüire jia saa'u tü kasa mojusü jaa'inrakat, süka eeyülüinya wayuu eekai manoujain nünain chi Maleiwakai ja'aka. Juu'ulaa jumaala suulia kaainjalaa je suulia jüüjüünin jia namüin na ekirajülüikana sünain alawaa süchiki tü oso'irawaakat aa'in sütüma wayuu.

**Wakuaippa waso'iraa'peena aa'in**

<sup>35</sup>Joolu'u, naya tasouktajanaka e'ipajee na asakitkana sünain



jamüinjatüin nukuaippa chi Maleiwakai süna'in süso'ire'erüin saa'in wayuu, je süna'in jamüinjatüin sukuaippa wane wayuu süchikijee süso'iraain saa'in. <sup>36</sup>Na'alainyaakai saa'in tamüin türa asakiraakat. Soto jaa'in sukuaippa wane waiyee süchikijee sojoitüinüin mmaapü. Müleka nnojorule süpottüin tü sütakat, nnojoleerü osotüin shia. <sup>37</sup>Tü ojoitünakat yaa mmaapü, nnojotsü shia'in tü pünajütakat, shia tü waiyeeekat ne'e, maa aka maikki je pitshuushi. <sup>38</sup>Chi Maleiwakai, ni'itaain tü pünajütakat süna'in naata'awain sukuaippa nütüma. <sup>39</sup>Akaajaa waya wayuukana, naatajatü wakuaiippa suulia mürtüt, suulia wuchii oo'ulaka suulia jime. Naata'awai sukuaippa kasa süpüshua. <sup>40</sup>Akaajaa tü kasa anakat ma'i we'riin chaa iipünaa, naata sukuaippa suulia tü we'rakat anain ma'i yaa mmalu'u. <sup>41</sup>Naatajatü nukuaippa chi ka'ikai suulia nukuaippa chi kashikai. Akaajaa tü jolotsükalüirua, eesü eekai miyo'uin no'u süna'in chuwatüin, je eesü eekai jo'uuchoin no'u. <sup>42-43</sup>Aka'aya wayakana, pejepa waya süpüla ouktaa, matsüinsat waa'in. Otta wojoitünapa süchikijee ouktaa, aja'lajaasü tü we'irukukat yala, je mojutsat sütüma wayuu süka saja'lajaaitpain. Otta so'uweena tü ka'i süso'iraainjatkat o'u saa'in wayuu, ee'iranajaweerü wakuaiippa süpüla nnojollüin saja'lajaain. Katsüinjeerü waa'in. Je kojuteena waneepia waya süpüla ka'ikat süpüshua nütüma chi Maleiwakai. <sup>44</sup>Tü sükuaippakat wayuu yaa mmalu'u, naata suulia akuaippaa cha'aya iipünaa nüma'ana chi Maleiwakai. Ke'irukushii waya

kataiwa'aya wo'u yaa mmalu'u, otta süchikijee süso'iraainjatüin waa'in, ee'iranajaweerü wakuaiippa süpüla katüinjatüin wo'u nümaa chi Maleiwakai waneepia.

<sup>45</sup>Je Adán, aapünüsü kataa o'u nüümüin, maa aka sümakat tü ashajuushikat: "Akumajünüshi Adán, chi palajachikai wayuu, süna'in saapünüin kataa o'u nüümüin". Otta Cristo, nia aapaka kataa o'u süümüin wayuu. <sup>46-47</sup>Chi ewetakai palajana, nia Adán. Müshi aka saa'in wayuu süpüshua yaa mmalu'u süna'in naapünüin amüin kataa o'u. Je chi ewetakai chiirua, nia Cristo. Nüma'anajeejachi nia chi Maleiwakai je antüshi süpüla naapünjachin kataa o'u süümüin wayuu. <sup>48-49</sup>Kataiwa'aya wo'u, müshii aka waya naa'in Adán süna'in wayuun waya. Je süso'iraapeena waa'in, meena aka waya naa'in Cristo, süka shii'iranajaweerüin wakuaiippa süpüla ayateenain waya nümaa cha'aya iipünaa.

<sup>50</sup>Tawalayuwaa, tamüshii paala jia jüchikua: Süna'in wayuun waya, aja'lajaajeerü tü we'irukukat oukta waya. Je müleka nnojorule shii'iranajaain wakuaiippa, nnojoleena waya ayatüin nümaa chi Maleiwakai waneepia chaa eere nuluwataain. <sup>51-52</sup>Taküjeerü achiki joolu'u jümüin tü nnojotkat atüjaanüin aa'u paala: Eejeena eekai kateenain no'u wanaa sümaa nüle'ejüin Cristo. Je waya anoujashiikana eekai kateenain wo'u nüpüla, namaa na eekai ouktüin paala, ee'iranajaweerü wakuaiippa waapapa shi'ira wane jontoroyoi chajee iipünaajee. Oso'iraajeerü naa'in na eekai ouktüin sümaa shii'iranajaweerüin nukuaippa. Je

wayakana katakana o'u, ee'iranajaa meeria wakuaiippa wanaa namaa, süpüla nnojoliinjanain aja'lajaa'in wakuaiippa süchikijee tia. <sup>53</sup>Müina nnojoliin ouktüin waya piantua, süka taasheerüin tü wakuaiippakat suulia aja'lajawaa. <sup>54</sup>Je so'u tü ka'i taasheetkat o'u wakuaiippa suulia aja'lajawaa, watüjaajeerü aa'u sünnain nnojoleenain ouktüin waya piantua. Je so'u tia ka'ikat, ekeraajeerü tü nüüiki Maleiwa makat: "Nnojo mmolüin jia seema tü ouktaakat, süka takanajüitpain shia". Je wane'e: <sup>55</sup>"Nnojoliinapa joolu'u waya mmolüin seema tü ouktaakat, süka nükanajüitpain shia chi Maleiwakai". <sup>56</sup>Mmotshii waya paalainka seema tü ouktaakat, süka kaainjaraliin waya wapüshua, je süka ouktajachin chi eekai kaainjaralin saashin tü nüüikikat chi Maleiwakai nüshajakat Moisés paala. <sup>57</sup>Otta sünnainjee süpüshua tü naa'inrakat chi Wasenyotsekai Jesucristo, nükanajüitpa tü ouktaakat chi Maleiwakai wapüleerua. Joo'uuya waapaiwa miyo'ushaata analu'ut nüümüin saa'u tü naa'inrakat.

<sup>58</sup>Tawalayuwaa, jia aikana tapüla, süka nükanajüitpain chi Maleiwakai tü ouktaakat, anakaja jüchecherüle jaa'in sünnain anoujaa, süpüla ji'yataainjanain nüümüin chi Senyotkai waneepia süka süpüshua jaa'in. Soto jaa'in sünnain nnojoleerüin sümalajaain tü anasükat jaa'inrakat nüümüin.

**Tü amüliajijatkat na anoujashiikana**

**16** <sup>1</sup>Soo'opünaa tü jüsakitkat anain taya sünnain tü neerü akotchajünajatkat namüin na wawalayuu müliakana cha'aya

Judea, anasü müle aka jütüma maa aka tü tamakat paala namüin na anoujashiikana sulu'u tü outkajaaleekalüürua cha'aya Galacia. <sup>2</sup>Riminko'ulu'uwai, anakaja jükatarüle süpüshi tü jüntakat anain süpüla sünaajünüünjatüin napüla na juwalayuu müliashiikana. Müleka eere kasa jüma'ana, anakaja jüsülajüle süpüshi. Jükotchajeerü shia nama'anajee napüshua sulu'u tü outkajaaleekat süpülapünaa tantüin suulia jükotchajüin ne'e shia tantapa. <sup>3</sup>Je tantapa cha'aya ja'akamüin, taapeerü wane karaloukta namüin na jüneekakana süpüla e'ikajawaa tü jüsülainkat chamüin Jerusalénmüin, süpüla natüjaanüin aa'u sünnain ajünalaain naya jütüma. <sup>4</sup>Je müleka anale to'unüinjachin wanaa sümaa no'unüin, anashii tamaainjanain naya.

**Tü nüchuntakat Pablo namüin**

<sup>5</sup>Je to'unapeena jünainmüin, chapünaainjachi taya Macedoniapünaa, je süchikijee, o'unaa meechia taya jünainmüin. <sup>6</sup>Eeweesü takalia cha'aya jümaa. Ta'ataapeerü cha'aya jümaa shijimalaain suulia shi'itüin tü juyakat. Acheküshii jükaaliijain taya sünnain tü che'ojaweetkat tamüin to'unapa chajee jüma'anajee. <sup>7</sup>Müleka to'unüleje jünainmüin joolu'u maa'ulu yaa süpülapünaa to'unüin Macedoniamüin, motso'ojeerü ne'e tama'a jümaa. Nnojotsü tacheküin sulu'u mayaa. Kakalieeshi taya jümaa müleka nücheküle chi Maleiwakai tapüleerua. <sup>8-9</sup>Otta müshia tayakai joolu'u, makateechi taya yaa sulu'u tü pueulokat Éfeso, süka wainmain a'yatawaa tapüleerua sünnain aküjaa

nüchiki chi O'tte'erüikai, mayaasiije wainmain eekai shiyouktüin tanüiki. Keraajeechi taya saa'in tamüin süpüla o'unaa süli'ütpa sükalia tü mi'iraakat kanüliakat "Pentecostés"

<sup>10</sup>Je nüntapeena Timoteo jünainmüin, anakaja müleka kamaneere jia nüümüin, süka ni'yataain nüümüin chi Senyotkai maa aka taa'in tayakai. <sup>11</sup>Nnojo ji'iyein jia nuulia. Shia anaka alu'u müleka jükaaliijüle nia süpüla nüle'ejüin nüchikua tanainmüin, je süpüla anain naa'in jümaa. Ta'atapajüin nia namaa na wawalayuu o'unakana paala nümaa jünainmüin.

<sup>12</sup>Otta müshia chi wawalakai Apolos jüsakirakai anain, nnojoishi o'uneein nia so'u ka'ikat tia. Teme'ejüinyaa'e paala naa'in shii'iree nu'uneein jünainmüin namaa na wawalayuukana. O'unajachi nia naajüin so'u wane ka'i nüchekakat o'u nu'uneein.

<sup>13</sup>Otta jgakana jüpüshua, anakaja jülüjüle jaa'in tü ka'i niitaainjatkat o'u chi Senyotkai sünnain jüchecherüin jaa'in sünnain anoujaa tü shiimüinkat ekirajünakat anain jia. Nnojo mmolüin jia seema eekai shiyouktüin jünüiki, katsüin ma'i jaa'in. <sup>14</sup>Je sünnain süpüshua tü kasa jaa'inrakat, anasü aire jüpüla tü wayuukolüirua süpüshua.

<sup>15-16</sup>Maa aka jütüjaain naa'u chi juwalakai Estéfnas sümaa tü nüpüshikalüirua sünnain nayain palajanain sünnain anoujaa nünnain Cristo ja'aka jgakana chakana Acaya, je sünnain nakaaliijain jia anoujashiikana süka süpüshua naa'in, anakaja jüüjüüle jia nüümüin

je namüin na eekai müinya aka naa'in sünnain na'yataain nüümüin chi Senyotkai. <sup>17-18</sup>Talatüsü taa'in nantapaatapa tanainmüin Estéfnas, Fortunato je Acaico, na jüjütakana süpüla nakaaliijain taya. Anashii kojutule naya jütüma je wayuu eekai müin aka naya, süka katsüin taa'in sütüma tü naa'inrakat, maa aka paala jgakana natüma cha'aya.

#### Nüpütaaya Pablo

<sup>19</sup>Nasaküin jia na anoujashii outkajaakana yaa sulu'u tü mmakat Asia, oo'ulaka Aquila sümaa Priscila tü nu'wayuusekat, oo'ulaka na wawalayuu koutkajaalekana namaa sulu'u nepia sünnain a'waajaa chi Maleiwakai. Aishii ma'i jia napüla. <sup>20</sup>Nasaküin jia na wawalayuukana napüshua'aya yaaya sulu'u tü pueulokat Éfeso. Anakaja jüsakiraale jüpüshua süka ajirain jia jüpüla sünnainjee anoujaa nünnain Cristo.

<sup>21</sup>Pütchikat tüü tasakakat aka jia, tashajala nüka tajapü, nnojotsü nüshajalain chi ashajüikai tamüin.

<sup>22</sup>Soto jaa'in wane kasa. Chi eekai maalin chi Senyotkai nüpüla, tachuntüin nüümüin Maleiwa süpüla kasalajanainjatüin nüümüin nütüma. Otta wayakana, anashii wamüle waneepia, "Senyotkalee, kasataalejese püle'ejüin maaliü".

<sup>23</sup>Achunteechi joolu'u taya jaa'u nüümüin chi Wasenyotsekai Jesucristo süpüla nii'yatüinjatüin na'anasia jümüin.

<sup>24</sup>Aishii jia tapüla, saa'u wayajiraainapain sünnain tü wanoulakat nünnain Cristo Jesús. Amén, shiimüin tia.